

明 鄭曉 撰

(國學文庫第一編)

皇 明 四 夷 考 全

中華民國二十二年六月重印



明 鄭 曉 撰

(國學文庫第一編)

皇 明 四 夷 考

中華民國二十二年六月重印

## 皇明四夷考序

四夷何以首安南也我郡縣也次兀良哈何我武衛也哈密女直非歟  
羈縻之虜非我官長也兀良哈之有三衛以靖難歟非也大寧之北有  
三衛也蓋自洪武始也其南據大寧也乃自永樂始也將復交趾而收  
大寧乎都統之議夷且囁我革蘭台以駸駸乎我貳矣棄哈密而撫女  
直乎哈密罷我河西女直扞我遼東也土番入哈密而喜峪不驚胡虜  
通女直而山海弗靖矣朝鮮何以次兀良哈也知禮教也大國也琉球  
小夷何以次朝鮮也學于中國也何以終韃靼也非勍寇乎我勝國也  
盛衰之運中國有安危焉以故別考而存之戰守之略可幾而得矣高  
皇何以有海外之使也更始也成祖西洋之艦不已勞乎鄭和之泛海  
與胡濶之頒書也國有大疑焉爾羌三王胡四王我屢屢焉西番五王

世優之何也不能爲我深創也苟因俗而治之得相安焉可矣西域何以不得浮南海也王公設險假樹渠焉如之何使其縱橫出入幾徧宇內也海島之夷勤我封使往來之禮歟夷不言往來往來言諸侯也四夷來王八蠻通道未聞有報使焉然則領封可乎奚爲而不可也陪臣請命于京師王人致命于海上非往來乎嗚呼均覆載者天德也辨華夷者王道也昔也外夷入中華今也華人入外夷也喜寧田小兒宋素卿莫登瀛皆我華人雲中閩浙憂未艾也是故慎封守者非直禦外侮亦以固內防也池魚故淵飛鳥舊林人情獨不然乎彼其忍於捐墳墓父母妻子鄉井而從異類者必有大不得已也嗚呼德惟善政政在養民蓋亦反其本矣不然而欲郡縣我子弟武衛我干城烏可得哉

嘉靖甲子三月朔日鄭曉識

# 皇明四夷考目錄

## 上卷

安南	三
兀良哈	二二
朝鮮	二六
琉球	三三
女直	三七
三佛齊	四一
占城	四三
日本	四七
真臘	六一
暹羅	六二
蘇門答刺	六三

## 下卷

爪哇	六五
古俚	六九
浡泥	七〇
滿刺加	七一
榜葛刺	七二
錫蘭山	七四
蘇祿	七五
柯枝	七六
祖法兒	七七
溜山	七八
南泥里	七九

黎伐	黑妻	一一一
哈密	鹽澤	一一二
赤斤蒙古	哈烈	一一二
安定阿端	默德那	一一四
曲先	俺都淮	一一五
罕東	八刺黑	一一五
撒馬兒罕	于闐	一一五
天方	火州	一一七
迭里迷	別失八里	一一八
渴石	魯陳	一一八
養夷	沙鹿海牙	一一九
達失干	賽藍	一二〇
卜花兒	哈失哈力	一二〇
土魯番	亦力把力	一二二

阿丹	一三三
白葛達	一三三
呵哇	一三三
殞里	一三三
西洋殞里	一三三
彭亨	一三三
百花	一三四
婆羅	一三四
阿魯	一三五
小葛蘭	一三五
拂林	一三五
古里班卒	一二六
呂宋	一二六
合猫里	一二六

---

碟里	一二七
打回	一二七
日羅夏治	一二七
忽魯謨斯	一二八
甘巴里	一二八
麻林	一二九
古麻刺	一二九
沼納樸兒	二九
加異勒	二九
黑葛達	三〇
敏真誠	三〇
八答黑商	三〇
覽邦	三一

皇明四夷考目錄

四

火刺札	一三一
討來思	一三二
吃力麻兒	一三三
失刺思	一三三
納失者罕	一三三
亦思把罕	一三三
淡巴	一三四
甘把里	一三四
白松虎兒	一三五
答兒密	一三五
阿速	一三六
沙哈魯	一三六
西蕃	一三七
鞬靼	一四二

# 皇明四夷考卷上

海鹽 鄭曉

皇明祖訓曰四方諸夷皆限山隔海僻在一隅得其地不足以供賦得其民不足以供役若其自不揣量來擾我邊則彼爲不祥彼旣不爲中國患而我興兵輕伐亦不祥也吾恐後世子孫倚中國富彊貪一時戰功無故興兵致傷人命切記不可但胡戎與西北邊境互相密邇累世戰爭必選將練兵時謹備之不征諸夷東北朝鮮卽高麗其李仁人及桂今名且者自日本雖朝實詐暗通奸臣胡正南

洪武六年至二十八年首尾凡弑王氏四王姑待之

正東偏北日本惟庸謀爲不軌故絕之

小琉球不會朝貢西南安南

皆入太學讀書禮待甚厚

一三貢年真臘朝常濱貢如暹羅朝常濱貢如占城

自占城以下諸國朝時內帶行商多譌許故沮之自洪武八年阻至

占城

占城以下諸國朝時內帶行商多譌許故沮之自洪武八年阻至

十二年方乃蘇門答刺海濱西洋海瓜哇海彭亨居海

百花居海三佛齊

居海淳泥居海中

洪武四年九月上御奉天門諭省府臺臣曰海外夷國爲患中國者不得不討不爲中國患者不可輒用兵古人言地廣非久安之計民勞乃易變之源隋煬帝妄興師旅征討琉球荼毒生民徒慕虛名疲中土載諸史冊爲後世譏朕以諸小蠻夷阻越山海不侵中國無煩用兵惟西北胡戎世爲中國患不可不謹備卿等記此言知朕意

洪武十五年命翰林侍講火原潔等編類華夷譯語上以前元素無文字發號施令但借高昌書製蒙古字行天下乃命原潔與編修馬懿赤

黑等以華言譯其語凡天文地理人事物類服食器用靡不具載復取元秘史參考以切其字諧其聲音既成刊布自是使臣往來朔漠皆能得其情

凡四夷分十八所設通事六十人大通事有都督都指揮等官統諸小通事總理貢夷降夷及歸正人夷情番字文書譯審奏聞

永樂七年遣太監鄭和王景弘侯顯率官兵三萬下西洋凡西洋功次卽非斬首選法不得減革十三年吏部員外郎陳誠上使西域記凡十

## 七國

## 安南

安南唐虞時南交也秦爲象郡漢爲南越所據武帝平南越置交趾九

真日南三郡朱梁時始土豪曲承美者據之已而并于劉隱未幾管內大亂衆推豪酋丁部爲州帥部子璉繼立宋旣平嶺表璉遂內附黎桓篡丁氏李公蘿又篡黎氏陳日暝又篡李氏宋以遠夷故置不問相繼皆封爲交趾郡王元朝兼有華夷至憲宗遣將破其國而日暝竄居海島弱不能支始歸附元封其子光昺爲安南國王光昺死子日烜自立元發兵破之日烜卒子日燁遣使朝貢元末天下大亂安南不至明興削平羣盜驅逐胡元洪武元年登極詔諭薄海內外日燁大懼又聞征南將軍廖永忠副將軍朱亮祖帥師逾嶺降何真定廣東西日燁欲納歛又以梁王尙在雲南持兩端二年始遣其少中大夫同時敏正大夫段悌黎安世等來朝貢請封遣侍讀學士張以寧典簿牛諒封日燁爲

安南國王賜駝紐塗金銀印以寧等至安南界日煃已卒其弟日焜嗣立遣阮汝亮迎請誥印以寧等不從日焜遣杜舜欽等請命于朝以寧駐安南候命詔封日焜爲王是年遣翰林編修羅復仁兵部主事張福詔諭安南占城國王各罷兵息民皆聽命三年日焜卒封其子日鑑嗣王五年陳叔明遣人朝貢却不受明年又遣人納貢謝罪請封當是時煒嗣王叔明者煒兄也專國政十二年煒遣使來貢上惡其彊悍數侵占城詔諭叔明二十年煒遣使貢賀聖壽二十一年國相黎季犧廢其主煒幽大陽坊尋弑煒立叔明子日焜主國事二十二年又弑日焜假煒名遣人來貢二十六年遣禮部尙書任亨太監察御史嚴震直諭令出兵討龍州趙宗壽二十七年遣人朝貢却不受二十九年遣行人陳

誠呂讓諭令還思明伍縣不聽陳氏傳十二世至日焜而黎氏篡立僭稱皇帝國號大虞紀元天聖永樂初季犚上表竄姓名爲胡一元子蒼易名奩詐稱陳氏絕奩爲陳氏甥求權署國事朝廷從其請逾年陳王孫添平走至京言季犚弑篡季犚詐上表請迎添平歸還以國上遣行人聶聰送添平歸國勅征南副將軍黃中呂毅率兵禦之季犚伏兵芹站殺添平及我使人上怒永樂四年七月辛卯以成國公能爲征夷將軍總兵官西平侯晟新城侯輔左右副將軍豐城侯彬雲陽伯旭左右參將大將軍率右副將軍右參將及清遠伯友統神機將軍程寬朱貴遊擊將軍毛八丹朱廣王恕等橫海將軍魯麟王玉商鵬鷹揚將軍呂毅朱吳江浩方政驃騎將軍朱榮金銘吳旺劉塔等二十五將軍以兩

京畿荆湖閩浙廣東西兵出廣西憑祥左副將軍左參將統都指揮陳  
睿盧旺等以巴蜀建昌雲貴兵出雲南蒙自兵部尙書劉備參贊戎務  
尙書黃福大理寺卿陳治轉餉是日上幸龍江禱祭誓衆曰黎賊父子  
必獲無赦督從必釋毋養亂毋玩寇毋毀廬墓毋害稼穡毋恣取貨財  
毋掠人妻女毋殺降有一於此雖功不宥毋冒險肆行毋貪利輕進罪  
人旣得卽擇立陳氏子孫賢者撫治一方班師告廟揚功名於無窮其  
往勉之時晟鎮雲南先遣彬以征夷副將軍印制授晟十月輔兵度坡  
壘關傳檄數黎賊二十罪遂入雞陵關晟兵至白鶴江賊拒守富良江  
能卒以輔爲征夷將軍代能十二月勅行人朱勸諭黎賊晟兵奪宣江  
進次沱江輔兵渡沱江合兵渡富良江進克多邦城焚賊西都賊走入

海輔駐兵交州晟追賊至木丸江五年正月輔晟合兵破籌江柵賊走  
閩海口敗之富良江五月賊走入安都督僉事柳升率舟師追賊敗之  
得賊船三百賊遁且入海輔晟乘勝追之升引兵出奇羅海口賊敗卒  
王柴胡等七人擒季整李保等十人擒其子澄安南人武如卿等僞大  
虞皇帝蒼僞太子芮僞將相王侯柱國黎季貔等詔求陳氏後復立爲  
安南國王國人言黎賊殘陳氏無後乃郡縣其地立交趾布政使司都  
指揮使司按察司分十七府曰交州北江諒江三江建平新安建昌奉  
化清化宣化大原鎮蠻諒山新平乂安順化升華四十七州一百五  
七縣衛十一所三市舶司一改鷄陵關爲鎮夷關安撫人民三百二十  
萬獲蠻人二百八萬七千五百糧儲一千三百六十萬石象馬牛十三

萬五千九百船八千七百軍器二千五十三萬九千勅黃尙書兼掌布  
按二司事勅輔晟雋交趾應有懷才抱德山林隱逸明經能文博學有  
才賢良方正孝悌力田聰明正直廉能幹濟練達吏事精通書算明習  
兵法武藝智謀容貌魁偉語言便利膂力勇敢陰陽術數藥醫方技之  
人悉心訪求禮送京師擢用九月輔遣升露布獻俘季犖蒼及僞將相  
下獄赦澄芮等令有司衣食之陞柴胡等指揮使僉事千戶是冬贈故  
安南國王陳氏子孫七人官六年七月進封輔爲英國公晟黔國公封  
升安遠伯八月交人簡定鄧悉反以晟爲征夷將軍帥師討之雋仍參  
贊十二月晟與賊簡定戰於生厥江敗績雋都督呂毅交趾參政劉昱  
皆沒七年二月勅輔總兵討賊言晟出師失律致賊猖獗今聞鄧悉死

而八百媳婦老撾猶供饋者何人賊云有象五萬又謂我將帥皆易與  
宜戒慎同心協力早滅此賊五月簡定稱上皇立陳季擴爲大越皇帝  
改元重光八月輔敗賊于鹹子關九月又敗之太平海口十月季擴稱  
故王後請封輔不聽進兵至清化十一月輔獲簡定及其僞將相八年  
正月召輔還令晟節制諸軍簡定檻至京伏誅十二月季擴人上表請  
降遣方通政諭季擴以爲交趾右布政使又以其黨陳原樽爲參政胡  
具澄景異鄧鎔都指揮潘季祐按察副使是月季擴景異復反九年正  
月以輔爲征虜副將軍總兵會征吏將軍晟率師討之二月詔赦交趾  
七月輔晟敗賊于月常江十一月輔率舟師破賊于海上十年八月又  
破賊于神投海口十月又破賊西心江十一年十二月輔晟會兵敗賊

于愛子江擒季擴十二年八月檻至京伏誅十三年四月以輔爲征夷  
將軍總兵鎮交趾十四年十一月召輔還豐城侯彬代輔十六年正月  
清化土官巡檢黎利反侯彬遣都督朱廣往勦之利初從季擴爲金吾  
將軍已而來降令爲土巡檢輔還遂反稱平定王以弟黎石爲相國段  
莽都督聚賊衆范柳范晏等肆出劫掠廣兵至斬首六百擒晏利遁去  
彬請就交趾戮晏等以狗七月交趾右布政使莫助及交州知府杜希  
望令縣丞黎獻率家人五百力役北京十七年巡按御史黃宗載言交  
趾新入版圖勞來尤在得人今府州縣多兩廣雲南歲貢生及下第舉  
人未入國學乞仕遠方遂授以職旣乏大學敎養之素又非諸司歷試  
之才以故牧民者不知撫字理刑者不諳法律若候九年黜陟屢弛益

多宜令到任二年以上者從巡按御史及布按二司嚴覈其廉汙能否  
上狀黜陟從之十八年五月勅侯彬叛寇黎利潘僚車三農文歷等迄  
今未獲未審兵何時得息民何時得安宜盡心畫方略早滅此賊交趾  
參政侯保馮貴討賊戰死十九年五月彬請屯田九月彬言利奔老撾  
我進兵討捕老撾輒遣頭目覽耆郎阻我兵勿入境云卽發兵象大索  
利送軍門久之竟不獲利上曰老撾匿賊持兩端令彬遣頭目至京詰  
之是冬赦利以爲清化知府遣內官山壽諭利二十一年仁宗卽位召  
福還以治爲兵部尙書代福是冬交趾參將保定侯瑛榮昌伯智言壽  
未至利復反改大理寺卿楊時習爲按察使以弋謙爲布政使內官馬  
騏自交趾召還未幾矯旨下內閣書勅復往交趾開辦金銀珠香內閣

覆請上正色曰朕安得有此言此奴曩在交趾荼毒軍民卿等獨不聞乎自騏召還交人如解倒懸豈可再遣然亦不誅騏也洪熙元年二月以智爲征夷副將軍總兵討利六月宣宗卽位七月命行在兵部侍郎戴綸副治贊理智軍務八月賊阮可郎等伏誅十一月勅智及安平伯安都督方政及三司賊利包藏禍心已非一日始若易取誤信人言惟事招撫迄今八年終不聽命忠臣罹害良民被毒其誰之過智等其急進兵務協和成功來春不捷論罪是月上欲棄交趾問英國公輔尙書義原吉皆曰不可棄問內閣士奇榮皆頓首稱善宣德元年三月智政兵討利進至茶籠州敗績四月以成山侯通爲征夷將軍總兵都督馬瑛參將討賊尙書治仍贊參軍務安平伯安掌交趾都司事削智政官

爵五月赦交趾十一月通擊賊敗績十二月賊攻清化州不利引去以安遠侯升爲征虜副將軍總兵保定伯銘左副總兵都督崔聚右參將由廣西黔國公晟爲征南將軍總兵興安伯亨左副總兵新寧伯忠右副總兵由雲南率兵兩道討賊兵部尙書李慶參贊軍務工部尙書兼詹事黃福仍掌交趾布按二司事勅通守城練兵侯升等至進兵二年正月上念久用兵勞費又問大臣士奇榮力贊上止兵棄交趾便利攻交趾城通等出戰敗之斬僞司徒司空太尉少尉太監黎笏等四月利陷昌江通歛兵不出賊書與通請和通遂許清化諸州地與賊遣指揮闢忠與利所遣人上表貢方物七月賊破隘留關圍丘溫鎮遠侯興祖擁兵南寧不肯援城陷逮興祖九月升等師至隘留關利遣人詣軍門

上書言窮迫乞罷兵立陳氏後升易賊賊伏四起升中鏢死是日銘病卒明日慶亦卒聚兵亦敗諸將兵皆阻賊不得進十月通出下哨河立壇與利盟約退師且宴利遺利金織文綺利亦以重寶謝通是月忠及利所遣人至京表以陳嵩爲名實出利上覽表示羣臣曰賊表乞復立陳氏後從之便抑不從便羣臣以內閣主議故皆曰從之便上曰然十一月以行在禮部侍郎李琦工部侍郎羅汝敬充正使通政黃驥鴻臚卿徐永達副使詔諭安南言利表言前國王遺嗣嵩尙在老撾國人乞封嵩王永奉職貢頭目耆老其以實對朕卽遣使授封朝貢如洪武故事又勅通等卽日班師內外鎮守三司衛所府州縣文武吏士携家來歸三年正月通馳奉僞王陳嵩遺黎少穎表貢代身金銀人謝罪并送

我叛人都督都指揮蔡福等還京乞班師臣寡援絕人情警懼賊控據水陸陷奪城池臣與衆議不如因其納貢請降全師出境再圖後舉臣已率將士還至南寧俟命上覽奏勅通虧損臣節遺笑蠻方如國體何三月少穎至京表稱安南國先陳王臣頃三世嫡孫臣嵩及頭目臣黎利云四月通至京羣臣劾通及瑛智安政布政使弋謙內官山壽馬騏等下廷鞫言通等失律喪師棄地壽曲護叛賊騏激變藩方論死繫詔獄籍其家瑛等坐罪有差興祖亦下詔獄五月琦汝敬等還利遣人表謝言嵩會病卒族人並絕國中推利守國候命汝敬永達復奉詔諭利及耆老訪陳後聞羣臣又劾晟亨忠奉命與升掎角進兵顧逗遛逾時方臨賊境與升等聲聞斷絕賊得專力拒我及聞升陷沒又不進援

通等輒狼狽引退爲賊所乘殺傷吏士委棄鎧仗賊勢益橫城池失守  
乞亟正邦刑上曲赦晟令臺中緘劾章示晟亨忠俟還京論罪贈交趾  
死節都指揮李任指揮顧福劉順徐騏周安千戶蔡顥桂勝知府劉子  
輔易先知州何忠內官馮智等官武官世職文官復其家誅叛臣蔡福  
等籍其家四年二月汝敬等還利遣人貢方物三月遣琦永達行人張  
聰勅諭利三月琦等還利遣人貢金銀釦器方物并上國人奏言陳氏  
無後利撫綏有方得民心乞令管攝永爲藩臣奉職貢六年五月利遣  
人陳情謝罪貢方物六月遣行在禮部侍郎章敞通政徐琦詔利權署  
安南國事七年二月敞等還利遣人貢謝八年八月利遣人入貢九年  
三月廣西總兵山雲言利死長子狂妄次子幼弱姦臣黎問黎察構黨

相讐殺夷民驚懼諒山土官阮世寧七源土官阮公廷率衆避難來歸  
願居廣西龍州及太平府上下凍州勅雲利本起微賤因奏立畧從人  
望朕志在息民遂詔罷兵徐議立畧利遽奏畧死畧之死利所爲也朝  
廷卽欲問罪不忍毒民令權署國事多行不義爲天所殛爾戒飭邊兵  
嚴謹守備勿忽世寧公廷可善撫之四月璫等還言利死利子麟遣人  
告喪獻金人方物五月遣行人郭濟朱弼祭利十月麟令人上表請命  
遣敵及行人侯璡諭麟仍權署安南國事十二月欽州貼浪如昔人叛  
降麟正統中麟卒子濬嗣天順中濬被篡弟灝嗣弘治中灝卒長子暉  
先卒子誼嗣正德初誼被篡國人請以灝庶子暉嗣朝廷登極改元遣  
使詔諭交酋亦數遣使朝貢然時南侵占城占城上聞諭禁之輒陽

聽命侵盜如故已而中國人多潛入交南至有受僞御史者教之窺伺  
雲南太監錢能貪殘令京衛指揮郭景矯奉勅旨往來交南猾夷奸闖  
出入莫敢誰何遂誘我逋逃覘我虛實鎮南關外類多華人而臨安諸  
郡所在有夷賊矣於是撫臣屢請增置文武吏士控制彈壓然交人侵  
奪欽州里社我亦不能禁是時瞞弱懦無爲境內盜起羣下專權虐政  
暴征人不堪命正德十年瞞遣阮仲達朝貢是年陳嵩作亂殺瞞奸酋  
莫登庸及其子方瀛結黎義昭等共推瞞從子諱嗣而討殺陳嵩嘉靖  
改元遣使詔諭瞞且死七年矣諱不請封輒改元光紹嵩父子亦據  
諒山等府稱王改元天應莫登庸妻瀨妻逼諱走海濱使命不能達而  
還當是時登庸遂與陳氏分據交地杜溫閏鄭綏不肯從登庸已而諱

死登庸又曰灝有子應諱弟也矯立庶相拒交人曰灝死久矣應本登庸子諱同母弟也嘉靖初田州岑猛叛兩廣總督姚鏞計鳩殺之謂岑氏可遂滅疏請設流官治田州而盧蘇王受諸孽輒通交南流言搖惑滇嶺間人鎮被論落職桂萼初嚮用言提督兩廣非新建伯王守仁不可遂起新建伯兼兵部尙書總制兩廣江湖諸省軍務新建伯至嶺南始知流官不可設請復官猛子邦相爲田州判官盧蘇亦與土巡檢羈縻之尋新建伯病謂翁萬達曰田州事非我本心後世誰諒我者新建伯初起用皆萼之力萼議禮致位卿輔欲立奇功會安南有亂冀可傳檄取之乃陰以意寓書授新建伯若專爲思田者使密探安南要領而新建伯不答直於奏尾稍及之萼遂恚憾會新建伯卒竟中傷革世爵

及卹典云嘉靖十五年哀冲太子生頒詔諸夷禮官言安南久不庭不必遣使請發兵討之下廷議諸大臣不可勅錦衣衛官使安南察之已而又遣禮部尙書黃綰翰林學士張治使安南時車駕巡承天綰治行有日又復止兩廣守臣言安南莫氏篡逆國內大亂時出侵掠遂命兵部尙書毛伯溫至廣東議方略進兵討莫氏會莫氏請命嶺南知府廉州張岳梧州翁萬達廣州鄒守愚及巡撫諸臣亦不欲用兵騷動數省條議上伯溫請赦莫氏以爲安南都統使會登庸死伯溫請以制命授其孫福海嘉靖二十年六月班師論功進秩賞賚有差未幾福海復爲黎寧所逐黎氏仍據國莫氏竄居南海島上朝廷置不問交趾東起欽州西歷左江北至臨安元江龍州其孔道憑祥其要害也由臨安經蒙

自河蓮花灘至其東都可四五日其俗夷獠雜居不知禮義獷悍喜鬪  
不解耕種椎髻剪髮好浴善水平居不冠惟交愛人倜儻好謀驩演人  
淳秀好學其山川佛跡勾漏海富良江爲大產金珠珊瑚玳瑁丹珠諸  
香蘇合油胡椒羚羊角犀象兜白鹿猩猩狒狒白雉翡翠蚺蛇蟻子鹽  
鹽波羅密烏木蘇木境內有越王城天使館浪泊柱銅鼓

### 兀良哈

兀良哈在烏龍江南漁陽塞北春秋時山戎地元爲大寧路戶四萬六  
千口四十四萬八千國初割錦義建利諸州隸遼東設都司於惠州領  
營興衛二十餘衛所所謂北平行都司也洪武十四年封子權於大寧  
爲寧王二十二年分兀良哈爲三衛於橫水之北曰朶顏曰福餘曰大

寧處降胡以脫魯忽察兒海撒男奚阿札失里爲三衛指揮使同知並  
邊爲我藩籬靖難初首刦大寧兵及召兀良哈諸酋率部落從行有功  
遂以大寧界三衛寧王移封南昌徙行都司於保定爲大寧都司令三  
衛歲二貢貢衛百人東起廣寧前屯歷喜峰近宣府爲朵顏自黃泥窪  
逾瀋陽鐵嶺至開原爲福餘由錦義度遼河至白雲山爲大寧皆逐水  
草無恒居三衛朵顏最強分地又最險永樂中最親附宣德時嘗入漁  
陽塞上率諸將出喜峰關敗諸虜于寬河誅其大酋自後稍馴順正統  
中又叛侵盜東北關諸寨索鹽米賞賜而已以故喜峰密雲間有都指  
揮或都督鎮守驗貢夷已已福餘大寧結也先爲也先嚮道朵顏獨扼  
險不肯從也先至不能入塞不得利大掠福餘大寧人畜去始勅都御

史鄒來學經略已而設太監參將又設總兵景泰四年守臣言兀良哈貢使往來不絕爲瓦刺間諜詔自後使至伴二三人入京餘不得輒入關成化四年與北虜毛里孩通侵天城遣都督李鐸詰之十二年通亂加思蘭謀寇遼東勅邊臣備之然亦未敢大爲寇盜弘治中守臣楊友張瓊燒荒出塞掩殺邊釁遂起正德初部落旣蕃陽順陰逆累肆侵盜朵顏都督花當求添貢其子把兒孫深入擄掠動稱結親迤北恐中國革蘭台者花當孫也兀良哈朵顏爲大部朵顏花當爲貴種花當長子革列孛羅早死其弟把兒孫驍勇十年把兒孫入馬蘭谷塞殺參將陳乾遣都督桂勇討之把兒孫遭扯禿等來言請入貢且獻馬贖殺乾罪又謾言射林孛羅幹兒路阿刺忽旦夕且糾諸部大舉入寇令小失台

呼扯禿等去我亦幸無事奏虜退班師未幾人寇參將魏祥全軍覆沒時把兒孫狡劣屢謀奪適諸酋惡之不相附尋亦死花當種人皆附革蘭台革蘭台貢馬遲之未請嗣番官也邊臣言上兵部令譯部落後許貢革蘭台遂入寇漁陽諸小關堡皆殘破嘉靖十一年九月巡撫王大用欲通朵顏與厚賂城其霧靈山不果是時酋阿堆哈利赤數入建昌喜峰太平諸塞殺掠人畜革蘭台又乞陞官兵部言大用喜事請以毛伯溫代大用出漁陽巡撫伯溫至鎮虜益盜邊邊人不得耕牧二十年革蘭台挾北虜求添貢貢衛三百人不許請衛二百人又不許時時出沒塞下輒云結小王子旦夕大舉入塞會俺答吉囊自大同深入大原不得已許其補前貢失期者衛二百人二十一年內批胡守中侍郎兼

憲職提督軍務撫勦守中憲險嗜利乾沒內帑金多又擅出塞盡伐遼  
金以來松木百萬自撤藩籬徧索富人舊將領金錢言官劾守中論死  
西市巡撫徐嵩阿事守中削籍已而有發嵩乾沒庫金者逮謫戍二十  
二年叛人白通事道虜數侵我塞巡撫許論伏兵斬白通事論進官副  
都御史請告去朱方代論以請撤防秋兵太早爲虜所掠逮至京杖死  
闕下職方郎中韓勗亦杖死方清勁勗端諒皆有才識死非其罪也二  
十五年虜大入塞明年北虜道兀良哈入寇遼東兀良哈又結海西建  
州夷出入遼東西塞下

朝鮮

朝鮮周封箕子國也秦遼東外徼漢初爲燕衛滿所據武帝取爲眞番

臨屯樂浪玄菟四郡漢末爲公孫氏所據魏滅公孫晉并於高麗高麗本扶餘別種王高璉居平壤卽樂浪已而東徙鴨綠江東南千餘里後唐時王建代高氏并有新羅百濟又徙東松岳以平壤爲西京子孫遺使朝貢宋遼金歷四百餘年元至元中西京內屬置東寧總管府洪武二年王王顥表賀卽位遣符寶郎楔斯賜金印誥命大統曆金綺封爲高麗國王并賜王母妃相國諸陪臣文幣五年王顥遣其禮部尙書吳季南民部尙書子溫表貢方物表言暹羅國恃其險遠不奉朝貢蒙古人留居其國宜徙之蘭秀山逋逃所聚亦恐爲寇患乞發兵討之賜璽書言暹羅隸爾國蒙古亦人類蘭秀山逋寇示以朕詔一呼可至勿用兵便十年以高麗貢使煩數遣故元樞密使延安答里諭意顥遣門下

贊成事姜仁裕表謝貢方物上令賀正旦使金渭及仁裕偕還賜王藥  
餌又諭中書省曰曩因高麗貢獻煩數遣延安答里往諭朕意今一歲  
迭至困罷其民涉海險遠如渠往使洪師範歸國覆溺幸有脫歸者言  
其故否且致疑古諸侯事天子比年一小聘三年一大聘若九州外遠  
番世一見而已貢物亦無過侈高麗去中國稍近人知經史文物禮樂  
略似中國非他邦比宜令三年一聘或比年一聘貢物產布十疋足矣  
丞相其以朕意諭王諸新附遠邦來朝亦明告以朕意中書因使者還  
咨諭之十六年遣使張伯崔泊來貢以違命却之令禮部諭王十七年  
諭遼東守臣絕高麗十八年國人立王禡爲王禡貢布萬疋馬千匹謝  
是秋封禡爲高麗國王賜其故王顥謚恭愍十九年請易冠服不許二

十二年國相李仁人刦囚禡而立其子昌爲王遣使姜伯淮朝貢是年  
仁人子成桂廢昌而立定昌國院君王瑤主國事二十四年瑤遣使朝  
貢又令其子奕朝明年正月詔位尙書下是年令市高麗馬萬匹索閹  
人二百二十五年成桂囚瑤及奕於其私第自主國事是年知密直司  
事趙胖等以其國都評議司奏至奏言恭愍王薨無嗣李仁人以他人  
子禡主國事昏暴好殺謀侵遼東大將李成桂力阻乃已禡自知負罪  
遜位於子昌國人弗順啓恭愍王妃安氏擇立宗親定昌國院君王瑤  
權國事及今四年昏迷譏其子奕亦癡駛縱酒色與禡黨玄禹實等  
謀復禡位守門下侍中鄭夢周曲附王瑤謀害成桂及趙俊鄭道傅南  
闔等今年七月國中臣民以安妃之命退瑤於私第擇于宗親無可立

者衆推門下侍郎李成桂主國事上曰朕中國綱常所在列聖相傳守而不失高麗限山隔海僻處東夷非我中國所治且事多隱曲不可據信令禮部移文從其自爲聲教成桂更名旦徙居漢城遣使請更國號詔更號朝鮮旦遣使請印誥上覽表怪旦不遜詰使者使者言表鄭集撰上盡却方物索集旦懼送集至京安置雲南二十七年令遼東絕朝鮮二十九年請印誥不許三十一年府部請發兵討朝鮮不許旦老請子芳遠嗣旦卒謚康獻永樂元年賜金印誥命冕服九章圭玉珮玉列女傳春秋會通大學衍義通鑑綱目諸書十七年芳遠老請子禡嗣芳遠卒謚恭定宣德初賜禡五經四書性理大全通鑑綱目五年禡遣使獻海青鷹使還賜王磁器諭禡王國中多珍禽異獸然朕所欲不在此

後勿獻自後聖旦元旦皆使朝貢王請封慶弔謝使來無常期朝廷有  
大政頒詔其國及王請嗣封皆遣使正統間賜王遠遊冠絳紗袍翼善  
冠龍袞玉帶景泰元年禡卒命子珦嗣珦卒賜謚恭順命子弘暉嗣弘  
暉幼叔璵以讓位請七年封璵爲王璵後不知幾傳而娶立正德元年  
娶卒謚康靖子懌立踰年而世子顥卒懌病風遜其弟懌正德二年懌  
立十五年封子嶧爲世子嘉靖二十三年懌卒二十四年嶧立未踰年  
卒二十四年嶧弟嵒立三十六年封長子顥清爲世子嵒疏乞改大明  
會典中所載成桂篡逆事從之其國東西南濱海北鄰女直西北至鴨  
綠江東西相距二千里南北四千里分八道統府州郡縣俗柔謹知文  
字喜讀書崇釋尙鬼惡殺戴折風巾服大袖衫男女相悅爲婚死三年

始葬飲食用俎豆官吏閑威儀居皆茅茨衣多麻苧以田制俸以糴醞  
酒法無苛條刑不慘毒山川丸都神嵩北岳海鵠綠江爲大產金銀鐵  
水晶鹽紬苧布白硃紙狼尾筆果下馬長尾雞貂納海豹皮八梢魚昆  
布杭黍麻榛松人參茯苓

琉球

琉球在海東南自福建梅花所開洋順飈利舶七日可至漢魏至唐宋  
不通中國隋嘗遣兵虜其男女五千人元遣使招諭竟不從洪武初國  
分中山山南北稱三王遣使朝貢十五年賜中山王察度山南王承  
宗鍍金銀印金幣使還言三王爭雄相攻賜詔諭之并諭山北王怕死  
芝十六年賜山北王印文綺王妃姪相寨官各有差二十五年中山遣

子姪及其陪臣子弟入國學上喜禮遇獨優賜閩人三十六姓善操舟  
者令往來朝貢永樂二年察度卒詔封其世子武寧嗣王是年山南王  
承察度卒無子令其從弟汪應祖攝國事應祖使來請命如山北王故  
事諭蹇尙書遣使賜應祖冠服嗣山南王九年中山王思紹令坤宜堪  
彌貢馬及方物以其長史程復來見表言長史王茂輔導有年乞陞國  
相兼長史事又言復本中國饒州人輔臣祖察度四十餘年不解于職  
今年八十有一乞令致仕還其鄉上從之陞復琉球國相兼左長史致  
仕還饒茂國相兼右長史景泰元年中山王尙思達遣人朝貢三王嗣  
封皆請於朝已而山南北爲中山所并中山遣使朝貢令三年一貢  
貢無過百五十人察度後五傳至尙圓嗣王卒子尙眞嗣嘉靖十一年

尙真卒子尙清請嗣遣左給事中陳侃行人高澄以太牢祀真封清嗣王賜王妃冠服錦幣使臣疏言弘治正德時修譏羅倫等嘗使安南安南乞留詔勅爲鎮國之寶倫爲請得留卽琉球請留如安南海外遠不得卽請乞下禮官議議請如安南使至國授封王拜曰天朝詔勅藏金匱者八葉于茲矣請留使許之比還遣其王親寧吉長史蔡瀚上表謝使上使琉球錄言大明一統志中載琉球有落漈王居壁下聚髑髏非實事杜氏通典集事淵海蠶蟲錄星槎勝覽所述亦皆傳者妄也乞下史館從之其俗以盈虛爲晦朔以草木爲冬夏人皆去鬚黥手羽冠毛衣無禮節好剽掠旣遣人學於國學夷習稍變奉正朔設官職被服冠裳陳奏章表著作篇什有華風焉今其國中王下有王親不與政次法

司官次察度官司刑名次那霸港官司錢穀次耳目官司訪問皆土官爲武職以上世及所轄地爲姓名其大夫長史通事官司朝貢有定員爲文職皆三十六姓人及學於國學者爲之王并日視朝旦中昃凡三朝羣臣搓手膜拜尊且親者入殿坐飲酒卑疏者移時長跪階下歲元旦聖節長至君臣冠服拜龍亭祝慶子爲親喪數月不肉食人死以中元前後日浴尸溪水去腐肉取骨纏以布帛裹葦草埋土中王及諸臣家匣骨藏山穴竅木爲小牘歲時祭掃啓視之地無貨殖不通商賈朝貢乘大航海上漁鹽泛小艇無竹筏信鬼畏神神以婦人爲尸號女巫女巫之魁稱女君白日呼嘯聚輒數百人携枝戴草騎步縱橫時入王宮褻遊狎戲一唱百和音聲悽慘倏忽往來莫可踪跡馮附淫昏矯誣

禍福王及世子陪臣皆頓首拜跪王居山巔國門名歡會府門漏刻殿門奉神朴素無金碧之飾賦法略如井田王臣民各分土爲祿食上下無征歛有事一取諸民事已卽已用刑甚嚴盜竊卽荆劓家富貴者瓦屋不過二三楹餘皆茅土風雨飄搖以螺殼爨爨無釜甑耕無鐵婦人嚼米爲酒男子煮海爲鹽市用日本錢十當一如宋季鷺眼縱貫人無貴賤皆驍健耐勞苦饑寒不知醫藥而無疾疫兵甲堅利射可至二百步進止有金鼓鄰國視爲勍敵然好爭狠鬪輒刃殺人度不能脫卽剖腹自斃其山川龍鼈嶼彭湖島爲大或曰國西古米山有礁甚險舟至輒敗卽落漈也產馬海巴牛皮磨刀石硫黃銅錫扇山無猛獸以故多野馬牛豕鬪鏗木蘇木胡椒諸香非其產也又有小琉球近泉州閩人

言霽日登鼓山可望而見入朝國未嘗朝貢或曰并入琉球琉球旁有  
毗舍那者島中小夷鳥語鬼形袒裸盱睢殆非人類不通中國

### 女直

女直古肅慎氏在混同江東瀕海西接兀良哈南鄰朝鮮北至奴兒  
干其地有長白山橫亘千里高二百里巔上有潭周八十里南流爲鴨  
綠江北爲混同混同江在開原城北千五百里又有松花江在開原城  
東北千里黑龍江在開原城北二千五百里與混同皆南入松花元設  
諸府路領混同江南北水達達及女直人明興遣人招諭永樂九年春  
遣將將水軍駕巨艦至江上召集諸酋豪餌以官賞於是東旺佟答刺  
哈王肇州瑣勝哥四酋率衆降始設奴兒干都司以四酋爲都指揮賜

勅印又置衛所三百八十二官諸小酋爲指揮千百戶鎮撫又有地面五十八站七寨一皆令三歲朝貢官賞羈縻之又置馬市開原城通交易稍給鹽米布贍諸酋豪使保塞不爲邊寇盜各路有水陸城站自湯站東抵開原曰建州毛鄰海西野人兀者皆有室廬建州最強開原北近松花江者曰山夷又北抵黑龍江曰江夷亦有室廬江夷爲強建州毛鄰本渤海氏遺孽喜耕種善緝紡飲食衣服頗有華風海西有山夷卽熟女直完顏餘種亦務耕稼婦女喜金珠倚山作寨亦名山寨夷江夷居黑龍江卽生女直數與熟女直讐殺百十戰不休諸夷皆善射馳獵好盜建州夷尤善治生其左右二衛最無賴江夷以北有阿哈婁得悍狡自相雄長大抵東北諸夷建州處要害居中與諸夷勢聯絡相掎

角五嶺喜昌石門險隘人騎不得成列虜人視爲咽喉永樂間開原降  
虜楊木答戶者率數百騎奔建州已而建州酋李滿住欵塞求內附駐  
牧蘇子河日強盛靖難未久專事撫綏桀鰲漸爲邊患一歲間入寇者  
九十七殺虜吏民十萬餘正統末附也先入塞侵遼東西景泰中諸酋  
多死也先之亂盡失賜勅諸子孫不得請官以舍人入貢賞宴大減以  
故怨忿思叛成化二年酋董山遂糾衆入寇三年武靖伯趙輔充總兵  
都督王瑛封忠爲副左都御史李秉督軍率漢番京邊官軍五萬討之  
山降送京師放歸廣寧輔秉曰山不可宥請誅山九月分左軍出潭河  
柴河越石門土木河至分水嶺右軍由鴉鶴關喜昌口過鳳凰城黑松  
林摩天嶺至潑猪江中軍自撫順經薄刀山鮎魚嶺過五嶺度蘇子河

至虎城期日會兵進勦朝鮮亦遣中樞府知事康純魚有沼南怡率兵萬人遏其東走我兵擣賊巢虜遁擒斬俘獲虜指揮若女等千人班師指揮張額的里率妻子乞降朝廷憐而釋之明年留韓斌爲副總兵防守築撫順清河鑿陽諸堡未幾諸夷憤欲報山讐相約入寇十四年入塞殺掠人畜無算巡撫陳鉞掩降虜爲功又附太監汪直開邊隙出塞撲殺諸夷諸夷益恨我大入塞殺掠吏民遺兵部侍郎馬文升反直撫勦直倖用事幸功陰爲鉞地要文升偕行文升弗聽疾馳至鎮撫定黑鎖忒諸酋比直至虜已解散直大怒文升還奏文升妄啟邊釁謂女直建州諸虜皆以文升曩在鎮禁不與易農器故屢寇塞上遣直及刑部尙書林聰卽訊遼東報上盡如直言下文升詔獄文升言實禁鐵器非

農器不聽竟謫戍重慶已而直敗貶內使南京鉞亦敗下詔獄文升得  
雪復官致仕正德八年海西加哈又叛嘉靖二十四年巡撫於敷減賞  
物夷人大譁不能拊顧詐殺諸譁酋夷人大恨數入塞殺掠大慘胡宗  
明代赦不能禦降浙江參議二十七年大虜通兀良哈諸女直入遼東  
代宗明巡撫李珏又論罷遼東西大因產楨矢石砮赤玉眞珠金麻布  
鹽馬黃狹虎羆狐狸海上有海豹驢獾猪羊狗野有野猪牛驢貂鼠青  
鼠失刺孫好刺殊角殊角即海象牙鯲鬚鯨睛海東青鷹鵠鴉鶲兔鶻  
鱗鯉牛魚粟麥穄

### 三佛齊

三佛齊卽舊港又名浡淋在東南海中本南蠻別種初隸瓜哇有地十

五州東距瓜哇西距滿刺加南距大山西北濱海番舶輻輳多廣東漳  
泉人土沃宜稼穡人好賭博習水戰服藥刀不能傷遇敵敢死鄰國畏  
之水多土少將領得居陸民率架筏水中架梁柱語言如瓜哇市用錢  
布字用梵書其屬有單馬令凌牙斯蓬豐登牙儂細蘭諸國洪武初王  
恒麻沙那阿稱臣入貢四年遣玉的力馬罕亦里麻思奉金字表朝貢  
賜大統曆文幣六年使來貢八年使從我招諭拂菻十年恒麻沙那阿  
卒賜王子麻那者巫里三佛齊國王印印駝鈕銀質鍍金是時廣東有  
陳祖義者脫罪避居其國久之得爲將領暴橫掠過客永樂中太監鄭  
和統海舶下西洋至三佛齊有施進者祖義鄉人也訴于和和擒殺祖  
義承制官進仍留舊港爲將領進沒女嗣官產鶴頂火雞神鹿金銀水

明珠珊瑚犀角象牙龍腦諸香猫睛石薔薇水阿魏沒藥血結鶴  
項鳥大於鵝腦骨厚寸餘外黃內赤鮮麗可愛火鷄大於鶴頸足亦似  
鶴軟紅冠銳觜毛如青羊色爪甚利傷人腹致死食炭神鹿大如巨豕  
高可三尺短毛豕喙蹄三跕

### 占城

占城古越裳秦林邑漢象林漢末區連殺縣令自稱林邑王遂不入版  
圖唐元和初改號占城宋淳熙中襲破真臘慶元中真臘復讐俘殺幾  
盡更立真臘人爲主洪武二年遣吳用顏宗魯楊載等使占城瓜哇日  
本等國賜王璽書是年遣使蒲旦麻都朝貢言安南侵境上遣使招諭  
安南罷兵是年國主阿答阿者遣虎都蠻來朝貢虎象遺中書省管勾

甘桓會同館副使路貢賢封阿答阿者爲占城國王賜大統曆金綺四年阿答阿者遣答班瓜卜農奉金葉表朝貢言安南數侵境乞賜兵器樂人俾安南知我乃聲教所被輸貢之地不敢輒欺負上憐之命中書省咨王言交鄰有道事上以誠占城安南旣皆臣事朝廷豈可擅兵相毒卽咨安南令其罷兵兵器不爾吝但以安南故賜爾是助爾構兵也樂器有聲律華夷方言本異中國人不可遣遺爾國人能習華音者來習肄十六年遣子來賀聖節賜勘合文冊二十四年使至以臣弑君故絕之永樂四年王占巴鎖里人勅王的賴得黎賊父子及其黨惡卽械送京尙書陳洽在南交軍中馳奏占城國王占巴的賴奉命出兵討安南陰懷二心愈期不進及進至化州輒肆虜掠又以金帛戰象資季擴

季擴亦以黎蒼女遺之復約季擴舅陳翁挺等三萬餘人復侵升華府  
隸四州十一縣地驅掠人民罪下季擴一等耳請發兵討之上以交趾  
初平不欲窮兵遠夷遣使諭王歸我侵地永樂後遣人朝貢令三年一  
貢正統六年國人請封其嗣王遣使冊封成化中遣使冊封正使卒海  
上副使論罪戍邊其國在大海南南距真臘西距交趾東北際海自閩  
長樂五虎門西南行順風可十日至東北百里海口立石塔爲標舟至  
是繫焉俗犷悍果于戰鬪尙釋敎王冠三山金花玲瓏冠衣白跣足乘  
象或黃犢車臣菱葉冠男蓬頭女後椎結所居茅茨不得踰三尺衣紫  
衣衣玄黃罪死出入乘象馬粒食亦鮮食殺牛祭鬼驅象逐邪市用金  
銀焚衣祭天釀酒甕中俟熟賓主繞甕坐筒而輦且輦且注水味盡而

止文書用羊皮及黑木皮無閏月晝夜各分五十刻王當賀日沐人膽汁將領獻人膽爲賀王在位三十年卽入山茹素受戒令子姪攝國居一歲籲天矢日我不道當充虎狼食或病死旣年得無恙復入爲王於是國人呼爲芳嚙馬哈刺札云有號屍致魚者婦人也目無瞳夜飛頭入人家食小兒穢氣侵兒腹兒卽死頭返合體如故失其體不得合卽死夫不聞者罪之產金銀錫鐵獅象犀牛瓊瑣諸香朝霞大火珠菩薩石薔薇水猛火油檳榔諸文異木胡椒白籐吉貝絲絞白氈布孔雀山雉伽南香惟此地有之價亦高觀音竹如簾長丈八尺許色黑如鐵寸二三節犀角象牙最多犀如水牛大者八百斤體黑無毛蹄有三跔獨角在鼻端長者可尺五寸馬小於驥玻羅密形如東瓜

## 日本

日本古倭奴國海中諸夷倭奴最大西南至海東北大山國主世以王爲姓羣臣亦世官地分五畿七道三島又有附庸國百餘拘邪韓最大其國小者百里大不過五百里戶少者千多止一二萬皆倭種也漢滅朝鮮通使稱王者三十餘國倭王最雄長者居邪馬臺卽邪摩維歷漢魏晉宋隋皆朝貢稍習華音唐咸亨初惡倭名更號日本國朝洪武二年倭寇山東並海郡縣又寇淮安三年寇山東轉掠浙東福建旁海諸郡是年遣萊州府同知趙秩賜璽書諭其王良懷言倭寇海上書至日如臣我奉表來庭不臣則修兵自固秩至諭王中國聖主威德責其入貢王曰吾國未嘗不慕中國顧蒙古戎狄蒞華以小國視我乃使趙良

弼誠我好語初不知其覘我國也旣而發舟數千襲我比至一時風霆  
漂覆幾無遺類自是不與通者數十年爾得非良弼後乎將刃之秩徐  
曰聖天子生華帝華非蒙古比我亦非良弼後爾殺我禍不旋踵王氣  
沮禮秩具物遣僧隨秩奉表稱臣入貢使未至又掠溫州五年上諭劉  
基曰東夷尙禪教姑遣明州天寧僧祖闡南京瓦官僧無逸開諭之良  
懷欲留二僧力辭王遣使同二僧入貢是年寇海鹽澉浦溫州初令浙  
江福建造海舟防倭而倭又寇福建海上諸郡六年以於顯爲總兵官  
出海巡倭倭寇登萊七年寇膠州是年遣僧來貢無表文却之其臣亦  
遣僧貢馬茶布刀扇上曰此私交也亦不受令中書省移文責王九年  
遣僧歸廷用等奉表貢馬及方物謝罪賜王及使文綺有差已而上覽

表曰良懷不誠詔責之十二年來貢無表文安置使人於陝西番寺十三年遣使詔諭良懷遣僧如瑤貢馬令禮部移書責王數掠我海上復却之諸僧皆安置川陝番寺十四年遣僧入貢乞還安置諸僧使上曰日本旣謝罪還其使召至京宴賞遣歸十五年歸廷用又來貢於是有一林賢之獄曰故丞相胡惟庸通日本蓋祖訓所謂日本雖朝實詐暗通奸臣胡惟庸謀爲不軌故絕之也是時惟庸死且三年矣十六年寇金鄉平陽十七年如瑤又來貢坐通惟庸發雲南守禦是年信國公和致仕居鳳陽上召至京諭曰日本小夷屢擾東海上卿雖老強爲朕行視要地築城防此賊信國公築登萊至浙沿海五十九城民丁四調一爲戍兵二十年置浙東西防倭衛所是年遣江夏侯周德興築福建海上

十六城設衛所遂梁福建漳泉人爲兵戍並海衛所二十六年寇金鄉  
二十七年二月遣都督僉事劉德商囂巡視兩浙防倭三月又勅都督  
楊文尋又勅魏國公徐輝祖安陸侯吳傑練浙江海上兵防倭二十八  
年寇金州靖難後太監鄭和等率舟師三萬下西洋日本遣人來貢并  
擒獻犯邊賊二十餘人卽付使人治之縛置甑中蒸死永樂二年使還  
遣通政趙居任賜王冠服文綺金銀古器書畫又給勘合百道令十年  
一貢每貢正副使等毋過二百人若貢非期人船踰數夾帶刀鎗並以  
寇論居任還不受王餽上喜厚賜之尋命僉都御史俞士吉賜王印誥  
冊封爲日本國王詔名其國之鎮山曰壽安鎮國山上爲文勒石久之  
嗣王道義卒子源道義嗣益奸狡時時令各島人掠我海上九年寇盤

石十五年寇松門金鄉平陽是年遣禮部員外郎呂淵諭王還所掠海上人十六年遣使謝罪當是時數入金蓋都督劉榮總兵守遼東繕海上堠堡伏兵伺之十七年倭船入王家山島傳烽沓至榮率精兵疾馳入望海塢賊數千人分乘二十舟直抵馬雄島進圍望海塢榮發伏出戰遣奇兵布伏諸山下斷其歸路賊奔入櫻桃園榮合兵圍而攻之斬首七百四十二捕生八百五十七召榮至京封廣寧伯自是不敢窺遼東二十年寇象山初方國珍據溫台處張士誠據寧紹杭嘉蘇松通泰諸郡皆在海上方張旣降滅諸賊強豪者悉航海糾島倭入寇以故洪武中倭數掠海上高皇旣遣使命將築城增戍又命南雄侯趙庸招蛋戶島人漁丁賈豎蓋自淮浙至閩廣幾萬人盡籍爲兵分十千戶所於

是海上惡少皆得衣食於縣官洪武末年海中方張諸逋賊壯者老老者死以故旁海郡縣稍得休息永樂初西洋之役雖伸威海表而華人習知海夷金寶之饒夷人來貢亦知我海道奸闌出入華夷相糾以故寇盜復起非廣寧之捷禍未已也宣德元年遣人來貢人船刀劍不奉我約束上諭使臣自後貢毋過三舟使人毋過三百刀劍毋過三十否不受七年遣人來貢如約束受之八年源道義卒命太監雷春少卿潘賜等弔祭十年嗣王遣使貢謝倭自得我勘合方物戎器滿載而來遇官兵矯云入貢貢卽不如期守臣幸無事輒請俯順夷情主客者爲畫可條奏卽復許貢云不爲例嗣後再至亦復如之我無備卽肆出殺掠滿載而歸宣德末年海防益備賊不得間貢稍如約遂許夷至京師宴

賞市易飽恣其欲已而備禦漸疎正統四年寇大嵩入桃渚官庾民舍  
焚劫一空驅掠少壯發掘冢墓束嬰孩竿柱上沃之沸湯視其啼號拍  
手笑樂捕得孕婦忖度男女剗視中否爲勝負飲酒荒淫穢惡至有不  
可言者積骸如陵流血成川城野蕭條過者隕涕於是朝廷下詔備倭  
命重帥守要地增城堡謹斥堠修戰艦合兵分番屯駐海上寇盜稍息  
七年來貢十一年寇海寧乍浦成化初忽至寧波知我有備矯稱進貢  
守臣爲請於朝且欲遣之至京楊文懿公守陳貽書張主客力言其不可  
許二十年遣周瑋等來貢弘治八年壽菴來貢正德六年宋素卿源  
永壽來貢求祀孔子儀注不許鄞人朱澄告言素卿本澄從子叛附夷  
人守臣以聞主客以素卿正使釋之令諭王效順無侵邊八年僧桂梧

等來貢嘉靖元年王源義植無道國人不服諸道爭貢大內藝興遣僧宗設細川高遺僧瑞佐及素卿先後至寧波故事凡番貢至者閱貨宴席並以先後爲序時瑞佐後至素卿奸狡通市舶太監饋寶賄萬計太監令先閱瑞佐貨宴又令坐宗設上宗設席間與瑞佐忿爭相讐殺太監又以素卿故陰助佐授之兵器殺總督備倭都指揮劉錦大掠寧波旁海鄉鎮素卿坐叛論死宗設瑞佐皆釋還給事中夏言上言禍起於市舶禮部遂請罷市舶而不知所當罷者市舶太監非市舶也夷中百貨皆中國不可缺者夷必欲售中國必欲得之以故祖訓雖絕日本而三市舶司不廢市舶初設在太倉黃渡尋以近京師改設於福建浙江廣東七年罷未幾復設蓋東夷有馬市西夷有茶市江南海夷有市舶

所以通華夷之情遷有無之貨收徵稅之利減戍守之費又以禁海賈  
抑奸商使利權在上罷市舶而利孔在下奸豪外交內調海上無寧日  
矣番貨至輒賒奸商久之奸商欺負多者萬金少不下千金轉展不肯  
償乃投貴官家久之貴官家又欺負不肯償貪戾甚於奸商番人泊近  
島遣人坐索久之竟不肯償番人乏食出沒海上爲盜貴官家欲其亟  
去輒以危言憾官府云番人據近島殺掠人柰何不出一兵備倭當如  
是及官府出兵輒齎糧漏師好語啗番人利他日貨至且復賒我如是  
者久之番人大恨諸貴官家言我貨本倭王物爾價不我償我何以復  
倭王不掠爾金寶殺爾倭王必殺我盤據海洋不肯去近年寵賂公行  
上下相蒙官邪政亂小民迫於貪酷苦於徭賦困於飢寒相率入海從

之兇徒逸囚罷吏黠僧及衣冠失職書生不得志羣不逞者皆爲之奸細爲之嚮導人情忿恨不可堪忍弱者圖飽煖旦夕強者奮臂欲洩其怒於是王忤瘋徐必欺毛醢瘋之徒皆我華人金冠龍袍稱王海島攻城略邑劫庫縱囚遇文武官發憤斫殺卽伏地叩頭乞餘生不聽而其妻子宗族田廬金穀公然富厚莫敢誰何浙東大壞二十五年以朱紈爲浙江巡撫都御史兼領興福漳泉治兵捕賊紈清諒方勁任怨任勞嚴戢閩浙諸貴官家嘗言去外夷之盜易去中國之盜難去中國之盜易去中國衣冠之盜難上章鐫暴貴官通番二三渠魁於是聲勢相倚者大譁切齒詆誣惑亂視聽改紈爲巡視未幾言官論劾又遣言官卽訊甘心煅煉必欲殺紈紈憤悶卒紈所任福建有功海道副使柯喬都

指揮盧鏗殺賊有功皆論死繫按察司獄於是華夷羣盜唾手肆起益無忌憚三十一年殘黃巖掠定海浙東騷動遣都御史王忬巡視兩浙兼領漳泉興福四郡以都指揮俞大猷湯克寬爲浙閩參將勦賊顧兵政久弛將士耗鈍水寨戰艦所在廢壞忬經略未幾羣賊總至柵寨列港外約諸島內招亡命勢益猖獗三十二年大猷冒險出洋焚蕩巢穴首賊逸去羣偷流散乘風奔突倏忽千里溫台寧紹杭嘉蘇松揚淮十郡並受其害克寬統領步兵往來海堧護城捕賊斬獲亦多忬不肯隱敗冒功擒治奸豪破解支黨大猷克寬兩參將皆知勇可任徒以江南人素柔軟賊未登岸望風奔潰文武大吏未能以軍法繩下而有司往往以軍法脅持富人巧索橫歛指一科百師行城守餉犒百物類多乾

沒十不給一廉謹之士又謂南人善謗低頭束手不敢動一錢於是公私坐困戰守無策始釋柯喬起盧鐘而賊船聯翩滿海破昌國臨山驟竚乍浦青村南滙吳淞江諸衛所圍海鹽太倉嘉定入上海掠華亭海寧平湖餘姚定海諸州縣焚劫殺戮污辱慘於正統時矣而通番奸豪又言忼大猷搗巢非計且搖動忼忼薦鐘起爲閩參將代克寬克寬以副總兵將屯金山閩人故忌鐘劾鐘凶險不可用南京言官又復薦鐘三十三年遂犯江北海門如阜通州皆被殺掠是時復用盧鐘爲參將而以俞大猷爲浙直總兵未幾工部侍郎趙文華以海賊猖獗請禱海神遂遣文華行禱公私勞費不貲皆歸囊橐比忼改大同巡撫徐州兵備李天寵代忼南兵尙書張經提督浙閩江南北軍務有王江涇之捷

文華素忌經天寵遂奏經天寵逮詔獄論死西市而以浙江巡按胡宗憲代天寵南戶部侍郎楊宜代經自後賊益熾縱橫出入二十六郡文華還朝未幾又出監督諸軍搜括官庫富蒙金寶書畫數百萬計交通蒙蔽以敗爲功以功爲罪雖有沈莊梁莊之戰竟莫救荼毒之慘兩浙江淮閩廣所在徵兵集餉提編均徭加派稅糧截留漕粟扣除京帑請給醴課迫脇富民釋脫凶惡濫授官職浪費無經其爲軍旅之用纔十之一征發漢土官兵川湖貴廣山東西河南北靡不受害臨賊驅之不前賊退遣之不去散爲盜賊行者居者咸受其害於是外寇未寧而內憂益甚矣宗憲計擒賊首王直浙西江東稍得安靖浙東溫台江北淮揚閩中嶺表尤被其毒已而俞大猷被中傷虛鐘代之賴朝廷聖明大

猷得不死江北巡撫李遂有廟灣之捷入南兵部爲侍郎唐順之代遂福建巡撫王詢數有功畏讒引疾去代者劉燾宗憲以擒直功陞右都御史加太子太保叙子錦衣千戶先是文華陞工部尙書以論吏部尙書李默卽加太子太保又以征倭功加少保子廢錦衣千戶不數月文華削籍千戶謫戍榆林自壬子倭奴入黃巖迄今十年閩浙江南北廣東人皆從倭奴大抵賊中皆華人倭奴直十之一二久之奸頑者嗜利貧窘者避徭賦往往喜賊至而貪殘之吏又從而驅之封疆之臣輒請添官當事者不敢阻於是添設都御史三人總兵一人副總兵二人參將十三人兵備副使十一人諸將校近百人田賦倍於常科徵徭溢於甲式矣其俗男子魁頭斷髮黠面文身婦人被髮屈紺皆跣足間用屨

其喜盜輕生好殺天性然也物產金銀琥珀水晶硫黃水銀銅錢白珠  
青玉蘇木胡椒細絹花布螺蚌漆器扇犀象刀劍鎧甲馬交市華人喜  
得童男女錦綺絲綿磁針

### 真臘

真臘本扶南屬國一名占臘在東海中隋始通中國唐神龍中并扶南  
而國分爲二其南近海多陂澤爲水真臘北多山阜爲陸真臘後復合  
爲一宋宣和初封爲真臘國王慶元中破占城立其國人爲占城王占  
城遂爲屬國又有參半真里登流眉蒲甘等國皆屬真臘聚落頗衆地  
亦廣洪武六年國王忽兒那遣柰亦告郎表獻方物賜大統曆文綺二  
十年正黎列保昆耶甘苦者遣使貢象及方物景泰二年貢賜王及妃

文綺朝貢至今不絕其俗尙華侈東向爲上右手爲潔縣鎮風習大類  
占城王三日一視朝婚娶燃燈不息視力耕種產銅金諸香象翠羽嘉  
樹異魚

暹羅

暹羅本暹與羅斛二國在南海中暹土瘠不宜耕稼羅斛土平衍種多  
穫暹仰給焉元至正間暹降羅斛洪武四年暹羅斛國王參烈昭毘牙  
遺柰思俚儕刺識悉替奉金葉表朝貢賜大統曆十年遣子昭祿羣膺  
奉金葉表貢象及方物遣使賜詔及暹羅國王之印十六年給勘合文  
冊令如期朝貢永樂元年稱暹羅國十五年瑣里人昭祿羣膺哆囉諦  
刺爲王遣柰必上表貢方物乞量衡式賜古今列女傳金綺量衡令三

年一朝貢宣德中稍減賜物著令其國方千餘里羣山環繞峭拔崎嶇  
地下濕土疎惡氣候嵐熱不齊自占城西南舟行七晝夜至其國王宮  
壯麗民樓居其樓密聯檳榔片築繫之甚固籍以簾席竹簟寢處于中  
王白布纏首腰束嵌絲帨加錦綺跨象或乘肩輿尙釋教國人效之好  
爲僧尼婦人多智夫聽於妻妻與中國人私不爲怪男陽嵌珠玉富貴  
者範金盛珠行有聲婚則羣僧迎婿至女家僧取女紅貼男額稱利市  
喪禮貴者灌水銀葬民間鳥葬言語大類廣東俗澆浮習水戰好鬪喜  
寇掠市用海舶煮海爲鹽釀秫爲酒產寶石奇香異木翠羽獅白象白  
鼠蘇木賤如薪色絕勝六足龜珊瑚

### 蘇門答刺

蘇門答刺卽古蘇文達那西洋之會要也東南大山西北距海山連阿魯那孤兒黎伐三國自滿刺加西南行順風五晝夜至答魯蠻村舍舟陸行十里至其國無城郭有大溪入海海口大濤舶至此往往沒溺洪武中國王遣人奉金葉表貢馬及方物永樂三年國王鎖丹罕難阿必鎮遣阿里來朝貢封爲蘇荅刺國王賜印誥金幣五年使來貢已而王與花面王戰敗中矢死子弱不能復讐其妻發憤令于國曰能復此讐者我以爲夫與共國事有漁翁聞之率衆敗殺花面王王妻遂從漁翁永樂七年王來貢上喜厚賜之十年遣使至其國故王假子率部衆殺漁翁王王子蘇幹利率衆奔于峭山時時相侵欲復讐十一年太監鄭和擒送京伏法漁翁王子感激貢方物甚夥宣德中貢使數至用金葉

表十年封其子嗣王皆有賜至今朝貢不絕風俗淳厚言語和媚室廬  
婚喪衣服物產類滿刺加田磽穀少熟番舶往來財貨充物人饒富市  
用金錫錢惟酋長好殺殺人輒取血浴身花面王者卽那孤兒王也國  
小僅比大村祇千餘家人皆榜面以故號花面風俗語言類蘇門答刺

### 瓜哇

瓜哇古閼婆國又名莆家龍元稱爪哇其國分東西二王所屬有蘇吉  
丹打板打綱底勿諸國洪武三年王昔里八達刺遣八的占必奉金葉  
表貢方物及黑奴三百人納元所授宣勅已而我使至三佛齊瓜哇要  
而殺之十三年王八達那巴那務遣阿烈彝烈時奉金葉表朝貢上遣  
其使還詔諭責王遂絕其使永樂二年其國東王遣使朝貢請印與之

五年西王都馬板與東王戰滅東王時我舟遇東王城西王殺我百七十人西王懼遣亞烈加恩謝罪勅詰責西王令償死者黃金六萬兩已而遣人貢萬兩禮官請索如數上曰朕利金耶令遠人知畏耳蠲其金賜鈔幣諭之十六年西王楊惟西沙遣人獻白鸚鵡正統八年令三年一貢其國四鄉初至杜板僅千家二酋主之流寓多廣東漳泉人又東行半日至廝村中國人客此成聚落遂名新村約千餘家村主廣東人番船至此互市金寶充溢人富饒又南水行可半日至淡水港乘小艇行二十餘里至蘇魯馬益亦有千餘家半中國人港傍大洲林木蔚茂有長尾猱數萬又水行八十里至漳治登岸西南陸行半日至王所居滿者伯夷僅二三百家總領七八人王宮磚墉高餘三丈方三十餘

里屋高四丈地覆板蒙籐花席跏趺而坐民居茅茨磚庫坐臥于內王蓬頭頂金葉冠胸繁嵌絲帨腰束錦綺佩短刀跣足跨象或乘牛民男蓬頭女椎結上衣下帨男必腰刀刀極精巧刑無鞭朴罪不問輕重籐繫刃殺之市用中國古錢衡量倍于中國磁銅綺帛國人大抵三種西番賈胡居久者服食皆雅潔中國流寓者尙回教持齋受戒曰唐人土人有名無姓尙氣好鬪顏色黝黑猿頭赤脚信鬼坐臥無椅榻飲食無匙箸啖蛇蟻虫蛆與犬同寢食不爲穢也婚男造女家後五日迎婦金鼓刀盾前後甚都婦裸被髮跣足繁嵌絲帨戴被金珠綵飾寶粧喪有水葬火葬犬葬惟死者所欲產金珠銀犀角象牙玳瑁青鹽檳榔椒香蘇木桄榔木吉貝倒掛烏綵鳩綠鳩紅綠白鸚鵡白鹿白猿猴

子履準校  
孫心材重校

皇明四夷考卷上

# 皇明四夷考卷下

海鹽 鄭 曉

## 古俚

古俚大國西洋諸番之會去中國十萬里西瀕海南距柯枝自柯枝海行可三日至永樂元年王馬那必加刺滿遣馬戍朝貢馬五年遣太監鄭和賜王誥幣陞賞其將領有差王好浮屠敬象牛老不傳子傳外孫否則傳弟無外孫弟傳善行人族類分五種如柯枝王南毘人不食牛將領回回人不食猪大家晨起用牛糞塗地煅牛糞爲囊佩之每旦水調抹額及股國事皆決于二將領土宜麥多馬俗尙信義行者讓路道

不拾遺海濱爲市通諸番用金銀錢以葫蘆爲樂器紅銅絲爲絃歌聲相協鏗鏘可聽刑無鞭笞輕斷手足重罰金誅戮沒產夷其族有西洋布曰撣黎本出鄰國坎夷巴匹濶四尺五寸色絲間花帨濶五尺產孔雀白鳩馬無餘鳥諸香嘗貢金絲寶帶金絲細如髮結花綴八寶珍珠鳩鵠石

淳泥

淳泥本閼婆屬國在西南大海中統十四州洪武四年王馬漠沙遣亦思麻逸進金表銀箋貢方物賜金綺永樂三年遣使封其國主麻邪惹加那乃爲淳泥國王賜印符誥幣六年王率其妃及子來朝遣使迎勞之福建至南京王上金表獻珍物妃箋獻中宮東宮上宴王奉天門是

年王卒于會同館謚恭順葬石子岡樹碑立祠有司春秋祀封其子遐  
旺嗣賜玉帶金銀綺幣器皿使送歸國遐旺請封其國後山賜名長寧  
鎮國上爲文刻石十二年洪熙元年皆來朝貢俗以板爲城以銅鑄甲  
煮海爲鹽釀秫爲酒喪葬有棺盛食無器室宇弘敞原田豐利習尚奢  
侈愛敬華人王服頗效中國產片腦諸香象牙吉貝玳瑁鶴頂

滿刺加

滿刺加永樂三年王西利入兒速刺遣使奉金葉表朝貢言願內附爲  
屬郡效職貢七年太監鄭和充冊封使賜印誥錦綺封爲滿刺加國王  
九年嗣王拜里迷蘇刺率其妃及子五百四十人來朝上御奉天殿宴  
王賜玉帶羽儀鞍馬金銀錢鈔錦綺王妃冠服子姓僕從賞各有差十

年遣使送還國十二年王母來朝貢厚賜之二十二年宣德九年王復來朝貢賜亦厚正統十年後數遣使來朝貢天順三年王無答佛哪沙卒子舟茫速沙請封遣使冊立爲王成化末給事中林榮行人黃乾亨奉使溺海死廕子入監讀書其國舊名五嶼東南距海西北皆山地瘠鹵故未稱國隸暹羅歲輸金五千兩旣奉我正朔始不隸暹羅王白帛纏首衣青花袍躡皮屨乘轎俗淳朴尙回回教民舍如暹羅婚喪大類爪哇聯榻趺坐剗木爲舟泛海而漁旁海人畏龜龍龜龍高四尺四足身負鱗甲露長牙遇人卽噭噭卽死山有黑虎視虎差小或變人形白晝羣入市覺者擒殺之

榜葛刺

西天有五印度國榜葛刺者東印度也永樂六年王靄牙思丁遣人朝貢九年至大倉命行人往宴勞之十二年王塞弗丁遣人奉金葉表獻麒麟國最大自蘇門答刺海行過翠藍島至淵地港更小舟行五百里至鎖納兒港登陸行三十五里至其國地廣人稠財物豐衍甲於諸鄰國國有城郭王及諸官皆回回人男祝髮白布纏頭圓領長衣束綵帨躡皮屨市用銀錢海貳五領山最高大氣候常熱如夏賦十二刑笞杖徒流官有印章行移軍有糧陰陽醫卜百工技藝大類中國有衣黑白花衫縫帨佩珊瑚琥珀纓絡繫臂硝子鍤鉗歌舞侑酒者曰根肖速魯柰柰蓋優人也能作百戲以鐵索繫虎行市中入人家解索坐虎于庭裸而搏虎虎怒交撲仆虎數回乃已或手投入虎喉虎亦不傷戲已仍

繫之家人爭以肉啖虎勞戲者錢曆有十二月無閏風俗朴厚人好耕殖一年二熟產鑽鐵翠羽瑠璃蛇馬桑漆樹絲綿尤多鎗剪最巧利布數種有潤四五尺者驀黑驀勒潤四尺背面皆毳絨厚可五分卽兜羅錦也白樹皮布膩滑光潤如鹿皮椰菱爲酒檳榔當茶

錫蘭山

錫蘭山在大海中海中有翠藍山最高大自山東南乘風可三日至赤卵塢塢人穴居男女皆裸若野獸不粒食食芭蕉子波羅蜜魚蝦又西海行可十日至佛堂山泊舟處濱海山麓有臥佛寺佛榻寶飾極華麗又西北陸行五十里至王居王尙釋重象牛煖牛糞灰塗體飲牛乳不食其肉殺牛者罪死王宮民居旦必調牛糞塗地而禮佛國富饒地廣

人稠亞於爪哇民上裸下纏帨加壓腰去鬚毫留髮布纏之女椎髻于  
後下縈白布飲食不令人見產青紅黃鴉忽石水晶海洲有珠池日映  
光浮起閃閃射日間歲一淘珠諸番賈爭來市珠土宜稻不宜麥市用  
金錢重麝香綺絹青磁器銅錢樟腦永樂九年王亞烈若柰兒鎖里人  
絕我使途太監鄭和俘至京十年封耶巴乃那爲王赦亞烈若柰兒還  
國耶巴乃那故王族人也一名不刺葛麻巴思刺查國人以爲賢故封  
之遣使送歸詔諭其國正統十年遣使耶把刺謨的里啞來朝貢珠寶  
石天順三年王葛力生夏刺昔利把交刺惹復遣使朝貢

### 蘇祿

蘇祿在東南海中人鮮粒食食魚蝦螺蛤短髮纏阜縊煮海爲鹽釀蔗

爲酒織竹布爲業氣候常熱永樂十五年其國東王巴都葛叭答刺西王巴都葛叭蘇哩峒王叭都葛巴刺卜各率其妻子頭目來朝貢珍珠玳瑁諸物賜王冠服玉金帶蟒龍金銀錢鈔錦幣器皿王妃王子女姻戚頭目賜物各有差三王者東王爲尊西峒二王副之歸次德州卒命有司營葬爲文樹碑墓道留其妃妾及僕從十人守墓令畢三年還國遣使封其長子都麻合爲蘇祿國東王十九年遣使來貢

### 柯枝

柯枝一名阿枝東連大山西南北皆海自葛蘭山海西北行一晝夜可至永樂二年王可亦里遣完者答兒朝貢請封其國大山詔封爲鎮國山賜碑文是時太監鄭和使至其國國王瑣里人也首纏黃白布上不

衣下繁絲帨束綵壓腰綴榔木葉苦屋國人五種曰南昆與王同類祝  
髮線懸脰爲貴族次回回人次富有財者曰哲地次牙繪曰革全又次  
卑賤者曰木爪木爪濱海而居業漁樵屋簷不得過三尺上衣不過膝  
途遇南昆哲地卽伏候過乃起王尙浮屠敬象牛建寺範金爲佛每日  
鳴鐘鼓汲泉灌佛頂數回已乃禮之有曰濁肌者蓋優婆夷也娶妻不  
剃胎髮髮縷縷垂後牛糞灰塗體行吹大螺妻隨之乞錢氣候常熱多  
雨市用金銀錢銀錢十五當金錢一產珠象牙蘇木

### 祖法兒

祖法兒亦名左法兒東南皆海西北重山自古俚西北海行十晝夜可  
至無城郭俗尙回回教體幹修碩語言朴實王白布纏頭衣青花絲帨

或金錦袍靴屨乘轎跨馬前後列象駝馬鼓吹氣候常如秋市用金銅  
錢錢文人形永樂中王亞里遣人來朝貢宣德中又來朝貢產西馬駝  
鶴頂駝雞福鹿片腦沉香乳香乳香卽樹脂諸奇藥以易中國紵絲磁  
器駝雞如鶴長三四尺脚二指毛如駝行亦如之駝單峰或雙峰皆可  
乘

溜山

溜山四面濱海如洲在西海中有石門如城闕土瘠無城郭依山聚居  
八村稍大皆以溜名可通舟楫餘小溜無慮三千土人曰此弱水三千  
也人巢居穴處不識菽粟啖魚蝦無衣草木葉蔽前後舟行遇風失入  
溜即溺溜山傍有牒幹國皆回回人俗淳厚業漁好種椰樹氣候常熱

如夏市用銀錢產龍涎香海貯椰皮結繩可貫板成舟塗瀝青堅如鐵  
釘鮫魚一名溜魚織絲悅甚精緻亦有織金帨永樂中國王亦速福遣  
使來朝貢

### 南泥里

南泥里隸淳沱自蘇門答刺舟行三晝夜可至東距黎伐西北距海南  
連大山山南際海僅千餘家皆回回人俗朴實王居類樓高廣嚴整幽  
潔市用銅錢少穀食食魚蝦西北大海卽西洋中有帽山平頂土人稱  
爲那沒黎番舶皆以此山爲指南山下淺水有珊瑚樹大者高二三尺  
分枝婆娑可愛依山居人二三十家皆稱王問其爲誰輒曰阿孤楂華  
言王也或曰南泥里卽南巫里

## 黎伐

黎伐小國南連大山北際海西距南泥里東南連那孤兒居民一二千家推一人爲首領隸蘇門答刺言語服用與蘇門答刺同山多野犀

## 哈密

哈密本古伊吾廬地在燉煌北大磧外西北羌胡往來要路也元封忽納失里爲威武王已而改封肅王卒弟安克帖木兒嗣國初置甘州五衛於張掖肅州衛於酒泉涼州衛于武威西寧衛于湟中又置山丹永昌鎮番莊浪四衛高臺鎮夷古浪三千戶所自陝西蘭州渡河千五百里至肅州肅州西七十里爲嘉峪關長陵初設關外七衛曰哈密曰安定曰阿端曰赤斤蒙古曰曲先曰罕東曰罕東左七衛皆在嘉峪關西

哈密又在六衛西東去肅州西去土魯番各千五百里北至瓦刺數百里永樂二年改封安克帖木兒爲忠順王以頭目馬哈麻火只等爲指揮等官分其衆居苦峪城三年忠順王卒無子兄子脫脫先是俘蠻夷邸朝議哈密爲西域入貢孔道宜釋脫脫令嗣王乃賜金印誥命玉帶文綺遣使送還令察諸番向背凡諸番貢物表文譯上四年賜王及其祖母速哥失里母妃從母綺幣有差是年速哥失里逐脫脫勅諸酋復立脫脫爲王六年脫脫暨祖母各遣使朝貢九年脫脫卒勅都指揮哈納爲都督僉事守哈密是年封力帖木兒爲忠義王賜印誥玉帶守哈密卒從父子孛羅帖木兒嗣仍封忠順王賜誥印十二年行在驗封員外郎陳誠使西域還言哈密城在平川可三四里東北一門王稱速壇

人僅數百戶顧非一種多蒙古回回人習俗各異產馬駝玉石鑽鐵犬尾羊陰牙角城北大山西南東皆平曠地多饒鹵宜穄麥豌豆農耕亦用糞壤人獷悍好利西域三十八國入貢經哈密者相攔出入索道路錢乃已洪熙元年貢硫黃上詰邊臣哈密何以有硫黃正統四年貢玉求紵絲與四表裏天順四年貢賜紙金箔薑桂茶礮成化元年令歲一貢貢不過三百人至京不過三十人貢物馬駝玉石鐵器諸獸皮三年以忠順王外孫爲都督賜銅印金幣八年都督赴京嗣官貢馬駝加賞時酋者林弑李羅帖木兒無子王母努溫答力理國事九年土魯番速壇阿力欲以哈密掠赤斤諸夷王母不從虜王母金印去遺番離散王母外孫都督把他木兒子罕慎避居苦峪其奸狡者陰附阿力伺我塞

下遣高陽伯李文通政劉文討阿力調罕東赤斤番兵數千駐苦峪不敢進阿力遂輕中國文等謬言不見土魯番遂還王母金印竟爲阿力所留益侵我城郭諸夷十四年阿力死子阿黑麻稱速壇未壯二十年守臣乘間請封罕慎嗣忠順王入哈密罕慎貪殘國人怨恨西域諸夷貢使往來者苦罕慎要索亦怨恨二十三年罕慎言瓦刺有克捨太師革捨太師克捨死其弟阿沙赤爲太師革捨弟阿力阿古多兀王與阿沙赤讐殺西走據哈密瓦刺尋退去弘治元年阿黑麻強曰罕慎非脫脫族安得王哈密哈密我當王欲殺罕慎畏我不敢發好語罕慎曰吾爲若聯姻若爲王益安無外侮罕慎喜許阿黑麻阿黑麻至哈密誘罕慎頂經結盟遂殺罕慎亦未敢顯言據哈密卽遣使人貢言罕慎病死

國亂乞遣大通事和番立我爲王居哈密領西域職貢兵部尙書馬文升言外夷北虜最強屢入貢乞通使我不聽阿黑麻小夷且與哈密各有分地不可輒通使亦不得王哈密彼入若貢我亦不拒請勅阿黑麻諭令還王母及金印還我哈密時王母已死四年遣哈密頭目寫亦虎仙齋勅諭阿黑麻以金印城池來歸遣使朝貢厚賞之陞寫亦虎仙爲都督僉事文升言哈密有回畏兀兒哈刺灰三種共居一城種類不貴不相下北山又有小列秃野也克力數種強虜時擾哈密必得元遺孽嗣封理國事庶可攝服諸番興復哈密不然未得休息乃立安定王族孫陝巴爲忠順王安定王者本脫脫種落令頭目奄克李刺阿木郎輔陝巴至哈密六年諸番索陝巴犒賜不得阿黑麻又恨阿木郎剋賜

物掠其牛馬遂入哈密殺阿木郎虜陝巴及金印去內閣丘濬謂文升曰哈密事重須公一行文升曰方隅有事臣子豈可辭勞但西域賈胡貫窺利不善騎射古未有西域能爲中國大患者徐當靜之濬曰有識言不可不慮文升請行諸大臣不可請勅兵部侍郎張海都督綱謙行視經略時阿黑麻貢使寫亦滿速兒等在京師令海至河西遣夷使二三人與邊通事致勅諭阿黑麻歸陝巴金印諸夷使爭欲去海不可乃遣哈密夷人以勅往阿黑麻竟留不報海不得已修嘉峪關捕哈密奸回通阿黑麻者二十餘人戍廣西請絕西域貢七年春海謙不俟命輒還逮下獄降海山西參政謙奪俸閑住文升言土魯番恃其強悍哈密奸回又反復欺負中國不懲創彼益輕中國請安置寫亦滿速兒等於

閩廣閉嘉峪關絕西域貢令諸夷歸怨阿黑麻當是時西域諸夷皆言成化間我入貢皇帝先遣中貴人迓我河南至京宴賜甚夥今不撫我我泛海萬里貢獅子謂我開海道却不受卽從河西貢者宴賞亦薄天朝棄絕我相率從阿黑麻且拒命中國能柰我何哈密奸回又附阿黑麻阿黑麻遂復入哈密自稱可汗大掠罕東諸夷譟言糾夷數萬用雲梯攻肅州且蹂甘州報至文升曰彼虛聲挾我也土魯番至哈密十數程中經黑風川哈密至苦峪又數程皆無水草貢使往返皆駛水行使我謹烽火明斥候整兵以俟彼至肅州我以逸待勞縱兵出奇一擊必使彼匹馬不返已而阿黑麻西去令頭目牙蘭以二百餘人據哈密文升曰非用陳湯故事此虜終不畏文升召肅州撫夷指揮楊翥至京撫

其背曰汝諳夷情知西域道路朝廷今欲擒斬牙蘭汝計安出翥曰此賊黠非襲之不可罕東哈密有捷徑可進兵兵可不十日至文升曰余欲選罕東番兵三千爲前鋒我兵三千殿後各持數日熟食兼程襲之何如翥曰善八年令河西巡撫許進調兵食遣副總兵彭清統精兵三千由南山馳至罕東卽調罕東諸番兵乘夜倍道襲牙蘭是冬進及總兵劉寧清率兵至肅州久駐關外候罕東兵不至乃出大路乏水草行不能疾牙蘭诇知遁去我兵入哈密斬首六十得陝巴妻女獲牛羊三千哈密脅從者八百餘人皆不殺攜歸住四敵上師還糧乏士馬亦多物故然西域自是知畏中國文升言兵雖抵哈密然未獲牙蘭首功亦少進寧及太監陸閻不遼節制徒取空城無益邊事獨軍事遠征勞苦

宜陞賞上念邊臣出塞有功閏歲祿二十石寧陞左都督加俸百石進  
左副都御史清都督僉事九年阿黑麻又襲破哈密令撒他兒及奄克  
孛刺住刺木城奄克孛刺密結瓦刺小列禿襲斬撒他兒奄克孛刺還  
守哈密阿黑麻遣人圍哈密哈密人舉火小列禿見之來援退走守臣  
奏乞令羈留貢使往諭阿黑麻納款文升曰阿黑麻未見遣使上款書  
不許是秋進改陝西巡撫十年秋阿黑麻令人送陝巴還哈密其兄馬  
黑上書言西域諸國不得貢怨阿黑麻今悔過乞許與黑婁諸國入貢  
及還寫亦滿速兒等文升言此虜挾詐俟陝巴金印至甘州取寫亦滿  
速兒等於閩廣是冬起王越爲太子太保左都御史總制甘涼等處邊  
務經略土魯番哈密十一年越出河西取陝巴至甘州令哈密三種都

督回回寫亦虎仙畏兀兒奄克李刺哈刺灰拜迭力迷失佐陝巴奄克  
李刺罕慎弟也恨土魯番亦與陝巴不協越以罕慎女也先主刺妻陝  
巴結好奄克李刺未幾越卒是秋賜陝巴大帽蟒衣玉帶象笏復封爲  
忠順王放寫亦滿速兒等西歸時哈密三種人久苦土魯番不願還文  
升請許半留肅州往來自便十二年春陝巴至肅州畏番虜不肯出關  
守臣遣參將率兵護行又賞赤斤蒙古諸番令逐程防護至哈密是夏  
寫亦虎仙致賞賜於土魯番遂與土魯番諸夷使入京朝貢十三年阿  
黑麻及黑婁諸國皆令人朝貢十七年春陝巴嗜酒掊克國人頭目者  
力克哈等迎阿黑麻次子真帖木兒守哈密陝巴棄城走沙州真帖木  
兒罕慎外孫也年十三不肯來哈密哈密人曰陝巴走哈密城空恐爲

野也克力達子所據真帖木兒始至刺木城其兄滿速兒乞守臣令人來守哈密真帖木兒自刺木城入哈密守臣令官舍董傑及奄克孛刺往哈密撫夷衆諭迎陝巴還頭目阿孛刺不聽必欲立真帖木兒爲王奄克孛刺與傑等擒殺阿孛刺等六人餘黨畏服守臣令都指揮朱瑄率兵送陝巴入哈密撫送真帖木兒還土魯番時阿黑麻死諸兄讐殺真帖木兒懼不肯還曰奄克孛刺我外祖願依之瑄慮陝巴疑貳攜真帖木兒居甘州正德元年陝巴死其子拜牙卽嗣封幼弱守臣恐真帖木兒還來侵哈密留不遣三年滿速兒稱速壇遣人朝貢乞還真帖木兒兵部尙書劉宇曰是謂質其所親愛不許四年滿速兒與拜牙卽乞還真帖木兒下守臣議五年真帖木兒走出城追而獲之六年守臣請

歸真帖木兒下兵部會議請勅宴賜真帖木兒及滿速兒拜牙卽并其  
親目七年冬令哈密三都督奄克孛刺寫亦虎仙滿刺哈三送真帖木  
兒西還八年春至哈密奄克孛刺不肯去寫亦虎仙滿刺哈三送至土  
魯番八月拜牙卽淫暴欲與奄克孛刺叛中國往土魯番奄克孛刺不  
從自哈密奔肅州拜牙卽棄城走入土魯番滿刺兒令頭目火者他只  
丁與寫亦虎仙滿刺哈三入哈密取金印火者他只丁又令哈密都指  
揮火者馬黑木等至甘州索賞哈密諸酋譯書言拜牙卽棄國從番乞  
卽差人守哈密巡撫趙鑑謬謂滿速兒忠義令火者他只丁寫亦虎仙  
滿刺哈三守城勤勞差撫夷官送土魯番諸酋金幣二百明年正月撫  
夷官纔至哈密滿速兒率衆亦至分據刺木等城真帖木兒又言河西

大饑窘人死亡且半甘州城南黑河可引灌城於是滿速兒及火者他  
只丁牙木蘭虎力奶翁寫亦虎仙滿刺哈三日夜聚謀侵甘肅番文索  
金幣萬萬還我哈密否卽插旗甘州門牙木蘭者本我曲先人與寫亦  
虎仙等專伺我虛實外挾強番內要厚賞自京師至甘肅偏置奸細巧  
爲交結肆行反間然亦專與哈密爲讐未敢窺嘉峪關也時總制都御  
史鄧璋請專勅大臣一人經略哈密大將督兵戰守特勅四川討賊都  
御史彭澤總督甘肅軍務統延寧固原諸鎮兵防遏土魯番夷勿使內  
侵逐勦西海卜亦刺勅寫亦虎仙等共守哈密勅責滿速兒送回拜牙  
卽十年春澤至甘州火者他只丁牙木蘭侵赤金斤王子莊澤以段布  
銀器并勅令通事與三都督送土魯番奄克亨刺時在甘州言我與番

世讐不肯去土魯番得賞物以金印與寫亦虎仙以哈密付滿刺哈三澤召還掌院事巡按馮時雍又言土魯番未聞請罪尙數侵邊下兵部尙書王瓊議乞留澤河西不允是冬寫亦虎仙等入京朝賀當是時土魯番四出侵掠關外諸衛及苦峪諸城殘破河西藩籬又結瓦刺窺我河西十一年李昆代鑑巡撫請勅滿速兒送還拜牙卽滿速兒不聽令火者他只丁牙木蘭復據哈密滿速兒至沙州脇土巴部落入嘉峪關令肅州奸回斬巴思高彥名等內應攻我肅州遊擊芮寧參將蔣存禮禦之敗績兵備副使陳九疇發憤捶死諸奸回及通賊都督失拜烟答灘城拒戰退賊又急調屬夷兵劫其老營遣人結瓦刺擣巢穴破其三城土魯番大創又盡發寫亦虎仙數十年傾陷哈密奸罪坐謀叛論死

時失拜烟答子米兒馬黑麻入貢在京巧賄權倖突入長安左門稱冤  
下錦衣衛會兵部三法司奏行河西訊報十三年逮昆九疇至瓊請廷  
鞫幾殺澤九疇昆降浙江副使澤九疇削籍是秋土魯番貢使至京兵  
部請繫獄輔臣梁儲不可乃已十四年刑部會訊脫寫亦虎仙死會上  
幸會同館寫亦虎仙米兒馬黑麻因權倖得見上賜國姓隨上南征嘉  
靖改元詔逮寫亦虎仙復論斬死獄中瓊謫戍澤起爲兵部尙書嘉靖  
元年昆爲兵部侍郎九疇僉都御史巡撫甘肅明年失拜烟答子米兒  
馬黑木寫亦虎仙子米兒馬黑麻皆論死三年滿速兒大舉入寇至甘  
州九疇忠勇先登力戰旣解甘州圍又夜率衆間道兼行抵肅州內外  
夾擊敗番兵殺火者他只丁虜退去關中守臣奏河西危急遣兵部尙

書金獻民都督杭雄率師西討獻民至蘭州諸番已爲九疇所敗出嘉  
峪關獻民用九疇議請遷發夷使閉關絕貢四年牙木蘭復據哈密侵  
肅州牙木蘭又入沙州五年起故輔臣楊一清提督軍務一清言我旣  
不能制其命又無以服其心徒絕彼之貢使不能阻彼之犯邊乞還九  
疇議遷烟瘴夷使解讐息兵未幾一清召入內閣尙書王憲代一清盡  
出平涼羈留夷使往諭土魯番令悔過服罪歸我哈密六年諸議禮臣  
桂萼方獻夫霍韜張璁先後上言哈密不靖本由彭澤澤得召用楊廷  
和曲庇澤也乞急用王瓊以寧西鄙七年滿速兒令牙木蘭據沙州索  
羈留貢使否且率帖木哥土巴攻肅州牙木蘭不肯欲殺牙木蘭牙木  
蘭懼棄菽麥數萬率老稚萬人帳房二千奔肅州乞白城山金塔寺住

牧守臣議留肅州是春起瓊兵部尙書兼右都御史代憲瓊至河西反澤所行事是秋天方撒馬兒罕哈密頭目各朝貢滿速兒亦乞通貢瓊爲奏上乞還羈使朝貢夷未報土魯番酋虎力納咱兒糾瓦刺侵肅州遊擊將軍彭濬兵備副使趙載禦之退去時張桂必欲論九疇死并罪廷和刑部尙書胡世寧力爭九疇忠勇再保全河西得不殺謫戍邊澤獻民閑住八年土魯番貢獅子夷人至乞歸哈密通貢瓊又奏言土魯番歸我哈密乞令失拜烟答子米兒馬黑木守哈密貢使二十四人遣入京放歸羈留各番貢使男婦凡千人安插沙州上巴帖木哥部夷五千四百人于白城山哈密都督癿吉孛刺部夷在肅州東關赤斤都督掌卜達兒子鎖南東在肅州北山金塔寺罕東都指揮枝丹在甘州南

山下兵部議當是時世寧爲兵部尙書欲專守河西謝哈密無煩憲中國韜上議必欲復哈密下兵部議世寧言昔太祖建北平行都司去境四百里而文皇界之兀良哈文皇郡縣交趾而宣宗棄之安南哈密非大寧交趾比况其初封忠順王爲我外藩者乃元遺孽永樂二年封三年卽故立其兒子未幾卽絕而強立非其子孫者嗣之蓋嘗三立三爲土魯番所虜乃叛我卽戍反勞中國臣竊以爲此與國初所封元孽爲和寧王順寧王安定王者等耳安定王又在哈密之內近我甘肅今亦不知其存亡何獨以一忠順王故耗我金幣疲我士馬窘我財力議禮諸臣不聽竟從瓊言牙木蘭以世寧言本歸正人非叛虜者唐悉怛謀事可鑒遂留不遣是時瓊言滿速兒歸我哈密奉約束朝貢然哈密竟

爲土魯番所據安插諸衛夷落皆爲土魯番所逐失其故土住牧河西  
塞上北虜盤窟西海瓦刺結巢北山河西三面皆有寇盜矣明年滿速  
兒遣虎力奶翁及天方諸夷使貢方物又索牙木蘭謠言諸番要約俟  
虎力奶翁歸復侵肅州會虎力奶翁歸道病死瓦刺又攻土魯番我亦  
有備稍得休息而來降人哈六刺言番酋欲以哈密城與都督米兒馬  
黑木母管理兵部因請許其通貢著令三年或五年爲期夷使雖多十  
二入京餘留塞上是後哈密竟爲土魯番所據河西守臣防禦羌胡不  
暇及西鄙事要之哈密守與否固不足爲中國利害也秦中老人曰土  
魯番哈密屢勤經略我義未直兵則何畏彼求方棘予則何恩况染指  
貢獻不足以示信侵漁宴賜不足以示廉而一時士習又皆重聲譽而

略綜核騰口說而賤實事不知中國之於夷狄固不可過撫以納侮亦不可深拒以窮兵惟順則撫故賞斯恩惟逆則拒故威斯畏况西域賈胡倚玉石以射利藉黃麝以厚生苟馭之有備又何患焉

### 赤斤蒙古

赤斤蒙古周西戎戰國月氏秦漢屬匈奴武帝取爲酒泉燉煌二郡唐末沒於吐番宋入西夏永樂二年故韃靼丞相苦朮之子塔力尼率五百人來歸設赤斤蒙古千戶所以塔力尼爲千戶賜誥印尋陞爲衛塔力尼爲指揮僉事十一年遣頭目鎖南吉利刺獻叛虜老的罕陞指揮使厚賜之塔力尼卒子且旺失加嗣宣德後朝貢不絕內白山最大多草木禽獸產金駝馬肉從容自土魯番陷哈密種人遂散亂

### 安定阿端

安定韃靼別部也地廣袤千里無城郭其俗馬乳釀酒氈帳爲廬產馬駝玉石洪武七年撒里畏兀兒安定王卜煙帖木兒或曰亦板丹遣使貢鎧甲刀劍賜金綺令分其酋長爲阿端阿眞苦先帖里四部賜卜煙帖木兒銀印仍稱安定王八年設安定阿端二衛分統四部卜煙帖木兒卒遣使諭祭賜嗣王勅誥金綺王遣使貢謝宣德初與曲先叛討平之天順三年安定王遣使來貢自後朝貢不絕成化中爲土魯番殘破遂服屬土魯番安定王苗裔無考

### 曲先

曲先古西戎部落永樂四年設曲先衛以土酋散西思爲指揮同知宣

德元年叛討平之論功加國師禪師秩已而遣人入貢正統二年頭目  
黑麻亂遣指揮火丁貢方物嘉靖中衛人牙木蘭爲土魯番所劫牙木  
蘭驍勇士魯番時時令率衆侵哈密擾我甘肅已而與土魯番疑貳擁  
帳來歸土魯番請還我哈密易牙木蘭欲殺牙木蘭警動我屬夷兵部  
尙書胡世寧以爲不可遂止當是時大抵嘉峪關西諸衛皆爲土魯番  
侵擾不復能爲我藩蔽矣

### 罕東

罕東本西戎部落洪武二十五年侵塞涼國公討之土酋哈答遁去三  
十年入貢立罕東罕東左二衛官其酋長鎖南吉刺思爲指揮僉事永  
樂二年鎖南吉刺思與其兄答力襲等十六人貢馬陞鎖南吉刺思爲

指揮使以塔力襲爲指揮同知頭目奴奴指揮僉事賜冠帶鈔幣有差  
自是歲貢不絕二罕東皆在沙州城沙州古燉煌地嘉峪關外諸衛二  
罕東最弱成化後土魯番迭入哈密二罕東不能支流散各城正德中  
陳九疇擊退土魯番沙州人稍得生聚復歸耕牧比牙木蘭再入沙州  
益殘破其酋土巴等叛附土魯番嘉靖中王瓊撫住白城山肅州月餉  
粟歲且萬石坐困邊儲

撒馬兒罕

撒馬兒罕漢廝賓也在哈烈東北三千里東去嘉峪關九千九百里東  
西相距千里地平山川鐵門峽阿木河最大風景偉麗土田膏腴宜五  
穀頗類中原獨勝諸國城依平原濠深險北有子城王居高廣在城北

隅王白帽城中達巷縱橫肆市稠密西南番賈多聚於此市易用銀錢  
禁酒俗尙回回教有拜天屋青石雕鏤極精巧以羊皮果經文文字泥  
金書人物秀美多藝能尤善作室國東有養夷沙鹿海牙塞藍達失干  
西有渴石迭里迷諸城皆隸焉洪武二十年國主帖木兒遣回回滿刺  
哈非思貢駝馬詔厚賜之二十二年貢馬二十四年貢海青賜勅賚予  
之二十七年帖木兒遣使迭力必失表貢馬二百匹表曰恭惟大明大  
皇帝受天明命統一四海仁德弘布恩養庶類萬國欣仰咸知上天欲  
平治天下特命皇帝出膺運數爲億兆之主光明廣大昭然天鏡無有  
遠近咸昭臨之臣帖木兒僻在萬里之外恭聞聖德寬大超越萬古自  
古所無之福皇帝皆有之所未服之國皆服之遠方絕域昏暗之地皆

清明之老者無不安樂少者無不長遂善者無不蒙恩惡者無不知懼今又施恩遠國凡商賈之入中國者使觀覽都邑城池富貴雄壯如出昏暗之中忽覩白日何幸如之又承赦書恩撫勞問使站相通道路無壅遠國之人咸得其濟欽仰聖心如照世之杯使臣心中豁然光明臣國中部落聞茲德音惟知歡舞感戴臣無以報恩德惟仰天祝頌聖壽福祿如天地遠大永永無極照世杯者其國舊傳有杯光明洞徹照之可知世事故云二十八年遣兵科給事中傅安郭驥等使西域留撒馬兒罕永樂五年頭目哈里令虎歹達送安等還且貢方物厚賜之改安等禮科賜衣安等言帖木兒本元駙馬卒孫哈里嗣上遣人祭帖木兒賜哈里璽書銀幣已而兀魯伯貢馬復遣安報使或曰兀魯伯卽哈里

洪熙元年安始還國請勅命吏部言安歷年雖久未經考覈例不得授  
景陵曰安使遠夷留二十餘年良苦何例爲與勅正統十二年又貢馬  
玉石四年又貢成化十九年阿黑麻貢二獅子夷使請大臣出迎禮部  
尙書周洪謨以爲不可遣中官迎之獅日食生羊二醋酣蜜酪各二瓶  
官養獅人光祿日給酒飯二十三年廣東布政司陳選言撒馬兒罕使  
臣怕六灣貢獅子欲於廣南浮海從滿刺加更市獅子入貢不可貴異  
物開海道利賈胡貽笑安南諸夷弘治三年由南海貢獅子禮官倪岳  
言南海非西域貢道請却之自後貢皆從嘉峪關入嘉靖中其國稱王  
者五十三人皆遣人朝貢產金銀玉銅鐵珊瑚琥珀琉璃罽茲思檀水  
晶鹽花藥布名馬獨峰駝大尾羊狻猊

## 天方

天方古筠冲地舊名天堂又名西城宣德中其王遣沙瓈來朝貢俗用回回曆風景融和四時皆如春田沃稻饒居民樂業男女辯髮馬乳拌飯產馬金琥珀玉石珊瑚犀角貢從嘉峪關入

## 迭里迷

迭里迷在撒馬兒罕西南去哈烈二千餘里新舊二城相去十餘里王居新城東距阿木河河廣非舟不可渡城內外居民僅數百家孳畜蕃息多魚河東地隸撒馬兒罕河西有蘆林多獅子

## 渴石

渴石在撒馬罕西南二百六十里城據大村周十餘里四面水田東南

近山中有園林故酋帖木兒駙馬居也規模極宏壯堂四隅白石柱如玉牆壁牕牖盡飾金碧綴琉璃西行十數里皆委曲山多奇樹又西去三百里大山屹立中有石峽兩壁懸崖宛如斧劈行二三里出狹口有門夷人曰此鐵門關也

養夷

養夷在賽藍撒馬兒罕亦力把力蒙古諸部落間數相侵擾以故人無寧居惟戍卒數百人處孤城中城四面皆亂山東北有大溪西流長數百里溪旁頽垣破廬蕭然草莽

達失干

達失干在賽藍西去撒馬兒罕七百里城據平原甚狹小四面平岡多

林木溪流蜿蜒土宜五穀人稠密質朴饒衣食

卜花兒

卜花兒在撒馬兒罕西七百里城居平川周十餘里民物富庶市里繁華戶口萬計地平行宜五穀桑麻天氣溫和冬不附火蔬菜不絕產絲綿布帛六畜大類中國

土魯番

土魯番一名土爾番在火州西百里古交河縣安樂城也城方一二里地平四面皆山氣候多煖少雨雪土宜麻麥有瓜果羊馬之利人皆屋居信佛法多僧寺城西二十里有崖兒城城僅二里居民百餘家相傳故交河縣治又云古車師國永樂十二年行在驗封員外郎陳誠使至

其國誠言城西北百里有靈山最大夷人言此十萬羅漢涅槃處也近  
山有高臺臺旁有僧寺寺下皆石泉林木從此入山行二十里至一峽  
峽南有小土屋屋南登山坡坡有石屋屋中小佛像五前有池池東有  
山山石青黑遠望紛如毛髮夷人言此十萬羅漢洗頭削髮處也循峽  
東南行六七里登高崖崖下小山纍纍峰巒秀麗羅列成行峰下白石  
成堆似玉輕脆不可握堆中有若人骨狀者甚堅如石文縷明析顏色  
光潤夷人言此十萬羅漢靈骨也又東下石崖崖上石笋如人手足稍  
南至山坡坡石瑩潔如玉夷人言此辟支佛涅槃處也周行羣山約二  
十餘里悉五色砂石光焰灼人四面峻聳窮崖天巧奇絕草木不生鳥  
獸鮮少云甘肅大抵無北虜患專鎮防西夷夷種中土魯番最奸狡宣

德五年始遣使來貢正統以後亦嘗來貢成化弘治間番酋阿力阿黑麻父子擾我西鄙虜我哈密忠順王罕慎陝巴拜牙卽是時專伺哈密至正德遂數犯我甘肅語在哈密傳中嘉靖十一年西域貢稱王者七十五人貢使至二百九十人禮官夏言請國稱一人王內閣張孚敬言西域稱王者多恐彼自封授或部落相稱先年入貢稱王亦有三四十人者答勅並稱王今盡裁奪恐夷情觖望下禮兵部議言言西域諸國稱王者惟土魯番天方撒馬兒罕三國如日落諸國名甚多朝貢絕少且與土魯番諸國不相統弘治正德間土魯番十三入貢天方正德間四入貢稱王者率一人或二人三人餘稱頭目親屬嘉靖二年八年稱王者天方至六七人土魯番至十一二人此兩年間撒馬兒罕至二十

七人內閣言先年亦有稱王至三四十人者併數三國耳乃今土魯番十五王天方二十七王撒馬兒罕五十三王併數則百五六十王前此所未有况所稱王號原非舊文卽有同者地面又異弘治時回勅書國稱一王若循撒馬兒罕往年故事類答王號人與一勅恐非所以尊中國而嚴外夷也自後各執賜勅率其部落貢不如期使不如數任意往來勢難阻絕驛傳勞煩宴賜頻數竭我財力以役遠夷計亦左矣上從言言當是時土魯番強殘破我嘉峪關外七衛及城郭諸國地大人衆非復陳驗封奉使時矣

### 黑婁

黑婁在嘉峪關西近土魯番世結好黑婁黑婁夷入貢從土魯番入其

地山水草木禽獸皆黑男女亦然宣德七年始遣使朝貢

鹽澤

鹽澤在崖兒城西南去土爾番三千餘里在平川中廣不二里居民百家黑的兒火者稱王居鹽澤既死土酋強者統之產石鹽堅白如石可琢爲器以盛肉食不鹽而鹹

哈烈

哈烈一名黑魯撒馬兒罕西南去嘉峪關萬三千里元駙馬帖木兒之子沙哈魯居其地國人稱爲速魯檀猶華言君王也東有俺都淮八刺黑諸城皆隸焉洪武二十五年遣使詔諭酋長賜金綺永樂七年頭目歷賚等朝貢十二年遣行在吏部員外郎陳誠使其國正統二年指揮

哈只等貢馬王石城方十里居平川川廣百里四面大山王並東北山  
壘石爲屋屋若高臺無棟梁牆壁牕牖皆金碧琉璃門扉雕刻嵌骨角  
屋傍設綵繡帳房爲燕寢所金床重茵衣冠大類亦力把力民土房或  
氈帳以兩少故上下相與直呼名雖王亦然相見稍屈躬道撒力馬力  
一語握手或相抱爲禮致意於人則云撒盤少炊爨飯食就肆無七箸  
交易用銀錢錢三等無正朔時日月亦無斗斛用權衡爲量稅十二國  
用資焉男髡首衣尙白乃喪易青黑無棺槨不祀鬼神祭先於墓所人  
多善走日行可三百里氣候常煖市中流水四時不斷多水磨風磨藝  
器尤精巧產巴旦杏鎖伏花毯金銀銅珊瑚琥珀水晶珠翠名馬獅子  
黑白文獸白鹽堅明如水晶琢磨爲器以水潤之和肉食多桑宜蠶爲

紈綺細密過中國農不甚勞然多穫田美而每歲更休地力得完也餽贈賜予宴會極豐厚男女瀆亂無耻大抵西域城郭諸國哈烈最鄙陋然有學舍聚生徒講習諸經義省刑罰薄賦歛寡爭訟好施予務農桑諸國又不及也在王城中極弘偉

### 默德那

默德那卽回回祖國初國王謨罕驥德生而聖靈臣服西域諸國諸國尊爲別譜援爾華言天使也國中有佛經三十藏凡三千六百餘卷書兼篆草楷西洋諸國皆用之隋開皇中國人撒哈八撒阿的斡葛思始傳其教入中國其地接天方有城池宮室田園市肆大類江淮間寒暑應候民物繁庶種五穀亦有陰陽星曆醫藥音樂諸技藝人俗重殺非

同類殺不食不食豕肉織文雕鏤器皿最精巧宣德中國王遣人隨天

### 方朝貢

### 俺都淮

俺都淮隸哈烈西南去哈烈千三百里東北去撒馬兒罕亦如之城在大村中村廣百里城居十一平曠無險峻地沃人繁庶稱樂土

### 八刺黑

八刺黑一名八黑在俺都淮東北城居平川周十餘里南近山無險阨地平廣食物豐饒西南諸番賈聚焉永樂中哈烈沙哈魯各遣其子守

之

### 于闐

于闐大國在葱嶺北二百里東西五千里南北千里漢唐皆入貢中國石晉時王李聖天自稱唐宗遣人入貢封爲大寶于闐國王宋末南遷朝貢不絕永樂六年頭目打魯哇亦不刺金遣滿刺哈撒木丁等貢玉璞十二年吏部員外郎陳誠至其國國主微弱鄰國交侵人民僅萬計皆避居山谷間境內惟火州魯陳哈失哈力阿力稍有城邑餘皆荒垣敗屋生理極蕭索永樂以後西戎奉職貢不敢輒相攻始得休息行賈諸番遂富饒桑麻禾黍宛如中土人機巧喜浮屠法好歌舞工紡織相見輒跪得問遺書戴于首乃發之稍知尊卑禮節狀貌亦似華人其山葱嶺爲大嶺下有白玉河綠玉河黑玉河產玉胡錦雙峰駝諸香珠珊瑚翡翠琥珀花藥布名馬臘臘金星石水銀獅子阿魏

## 火州

火州在嘉峪關外行可一月至本漢車師前後王地前王治交河城卽唐交河縣去長安八千里後王治務塗谷卽唐蒲類縣去長安九千里漢元帝時置戊己校尉屯田於前王庭以其地勢高敞名高昌壘後魏初有闕伯周者自稱高昌王唐太宗平高昌置西州及都督府後陷於吐蕃其地有回鶻雜居故又名回鶻宋時屢遣使貢元號畏兀兒隸馬哈木八國朝號火州其東七十里有柳陳西百里有土魯番火州城近北地卑下山色如火天氣多熱城方十餘里永樂七年土魯番遣人朝貢十二年吏部員外郎陳誠至其國誠言其國風物蕭條市里民居僧堂過半亦皆零落東有荒城故址云古高昌國治漢西域長史戊己校尉

並居焉宣德五年火州王哈散土魯番萬戶賽因帖木兒柳陳誠萬戶  
瓦赤刺俱遣人貢馬及玉璞至今入貢不絕俗類匈奴烏孫事天神信  
佛法貴食馬好騎射時節潑水爲戲其山川靈山蒲類海交河爲大產  
馬駝鹽白氈布鑽鐵陰牙角阿魏

別失八里

別失八里在西域永樂三年其王沙迷查干遣人言哈密忠順王安克  
帖木兒爲北虜鬼力赤毒死願率兵討之上喜遣使賜綵幣勅令與嗣  
忠順王脫脫相睦

魯陳

魯陳一名柳城古柳中縣地去哈密千里中經大川砂磧無水草馬牛

過此輒死大風倏起人馬相失道傍多骸骨有鬼魅行人失侶白日迷亡夷人謂之旱海出川西行至流沙河河上有小岡云風捲浮沙所積道北火焰山山色如火城方二三里四面多田園流水環繞樹林陰翳土宜穄麥麻豆有小蒲萄甘甜無核名鎖子蒲萄氣候和煖風俗醇朴人二種回回男子削髮戴小罩刺婦女白布裹頭畏兀兒男子椎髻婦人蒙卓巾垂髻於額大抵皆胡服

### 沙鹿海牙

沙鹿海牙在撒馬兒罕東五百里城據小岡西北臨山河河名水站勢衝急有浮梁其地南近山三面皆平川人繁庶依崖谷而居園林廣茂西有大沙洲可二百餘里無水卽有水人不可飲飲牛馬亦輒死有臭

草根株獨立高尺許枝葉如蓋春生秋死臭氣逼人取生汁熬膏爲阿  
魏亦有細草可熬膏味如蜜

### 賽藍

賽藍在達失干東西去撒馬兒罕千里城周三里四面平原草木長茂  
流水環繞五穀蕃殖秋夏間草生黑蜘蛛甚小毒甚噉人遍身痛號呼  
聲動地土人禳詛者口誦呪以薄荷枝拂中毒處又以鮮羊肝遍擦其  
體經一晝夜痛方息愈後皮膚如蛻脫牛馬被傷輒死行人宿必近水  
避之

### 哈失哈力

哈失哈力宣德間遣十四人來朝貢或曰卽阿力馬力

## 亦力把力

亦力把力在沙漠間或曰焉耆或曰龜茲元時名別失八里馬哈木封於此洪武二十四年國王黑的兒火者遣人貢馬永樂四年王沙迷查干遣人貢玉璞十二年陳吏部使其國十六年頭目速哥克刺滿刺來朝言至思弑其從兄王納黑失只罕自立爲王徙其國西去更號亦力把力正統二年王也先不花遣人貢玉璞駝馬景泰三年遣人朝貢天順以來入貢不絕其國無城郭宮室逐水草住牧設帳房氈罽寒暑坐臥於地其王戴小罩刺簪鷄翎衣禿袖衫削髮貫耳飲食肉酪或食穄麥爲毛布多雪霜平曠之地夏秋略煖深山大谷六月飛雪俗獵戾服用汚穢上下無紀律其山白山葱嶺爲大有熱海然氣候常寒產銅鐵

鉛雌黃胡粉馬駝犖牛孔雀鸕鷀阿魏白疊布

阿丹

阿丹近古俚瀕海可舟行國中富饒有馬步勝兵七八千鄰國畏之永樂九年詔中使鄭和賜命互市

白葛達

白葛達海中小國土瘠俗向佛教宣德七年國王遣和者里一思等來朝貢

阿哇

阿哇永樂中王昌吉刺遣人來朝貢

瑣里

瑣里西海中小國物產甚微有撒哈刺諸異布洪武五年國王卜納的  
遣撒馬牙茶嘉兒幹的亦刺丹八兒奉金字表朝貢圖上其土地山川  
賜大統曆金幣永樂元年復遣人朝貢

### 西洋瑣里

西洋瑣里近瑣里視瑣里差大物產大類瑣里洪武三年使來以金葉  
表文貢方物上喜王敬中國涉海道甚遠賜甚厚永樂元年復遣人朝  
貢上曰海外遠夷附載番貨勿征二十一年西洋十六國遣使千二百  
人貢方物至京師西洋瑣里貢獨豐美

### 彭亨

彭亨在東南海島中並山山傍多平原禽獸稀少草樹繁茂沃土宜穀

饒蔬果洪武十一年遣人奉金葉表朝貢賜綵幣永樂十二年遣蘇麻  
固門的里來朝貢其俗上下親狎無寇盜男女椎髻好誦佛經煮海爲  
鹽釀榔爲酒產片腦諸香花錫

百花

百花在海中依山爲國國中有奇花嘉樹民俗饒富尙釋敎洪武十  
一年國王刺丁刺者望沙亦遣八智亞壇奉金葉表朝賀產紅猴龜筒玳  
瑁孔雀倒掛鳥胡椒

婆羅

婆羅負山面海人多念佛素食惡殺喜施永樂四年國王遣人勿黎哥  
來朝貢真珠玳瑁馬瑙車渠賜王及妃文綺

阿魯

阿魯一名啞魯在西南海中土廣人稀物產亦薄永樂五年國王速魯唐忽先遣滿刺哈三附古里諸國來朝貢令內臣至其國賜王文綺

小葛蘭

小葛蘭小國也東連大山西南北皆海永樂中太監鄭和至其國王鎖里人遣人入貢俗尙浮屠重象牛飯和酥酪市用金錢婚喪巾服大類錫蘭山自錫蘭山別那里西北海行六晝夜可至

拂菻

拂菻在嘉峪關外萬餘里洪武四年遣其國故民惶古倫賚詔諭之尋遣人來朝貢其俗土屋無瓦貴臣如王服不尙鬪戰鑄金銀錢產金銀

珠西錦千年棗馬獨峰駝巴欖

古里班卒

古里班卒在海中永樂三年國王遣人馬的來朝貢其俗土瘠穀少登氣候不齊夏多雨雨卽寒俗質朴男女被短髮假錦纏頭紅油布繫身物產甚薄

呂宋

呂宋在海中其國甚小顧產黃金以故亦富厚人頗質朴不喜爭訟永樂三年國王遣隔察老來朝貢

合貓里

合貓里地小土瘠國中多山山外大海海饒魚蟲人亦知耕稼永樂三

年國王遣回回道奴馬高來朝貢產蘇烏木胡椒

碟里

碟里國在東南海中大洲上洲有諸港通海人淳少訟尙佛物產甚薄

永樂三年國王遣使馬黑木來朝貢

打回

打回海外小國數爲鄰國所苦己乃治兵器與鄰國戰戰勝稍得自立

永樂三年遣麻勿來朝貢

日羅夏治

日羅夏治海中小國無他奇產產蘇木胡椒人頗知種藝無盜賊崇佛

教永樂三年國王遣文那打時鎮來朝貢

### 忽魯母恩

忽魯母恩在東南海中或曰在西徼外國小土瘠物產薄永樂三年國王遣已卽丁朝貢

### 忽魯謨斯

忽魯謨斯在西南海中東連大山國中土厚宜耕種人質直狀貌偉碩喜作佛事常歌舞惡殺永樂三年國王遣馬刺足來朝貢產大馬西洋布獅子駝鷄福祿靈羊馬哈獸

### 甘巴里

甘巴里在南海中大島上人多織錦粒食亦鮮食永樂十二年國王兜哇刺查遺得名公葛葛來朝貢

麻林

麻林未詳其國所在永樂十三年王遣人獻麒麟上喜厚賜之

古麻刺

古麻刺在東南海中永樂時王哇來墳本率其臣來朝至福州卒賜謚

康靖勅葬閩縣有司歲時祭

沼納樸兒

沼納樸兒在印度之中古所謂佛國也永樂中遣使詔諭國王一不刺

金玉遣人來朝貢

加異勒

加異勒西戎小種居人不及千家貧窶乏食常傭鄰國永樂中王者麻

里柰那遣使別里呆不來貢方物宣德間遣使朝貢

### 黑葛達

黑葛達國小民貧平川廣野草木暢茂禽獸鮮少俗尙佛畏刑市肆多牛羊交易用鐵錢宣德中國人嘗遣使十人來朝貢方物

### 敏眞誠

敏眞誠國亦大多高山水流深縛木爲渡日中爲市諸賈皆集見中國磁漆器爭欲得之產異香駝馬永樂中國王遣四十人來朝貢

### 八答黑商

八答黑商永樂間遣四十人來朝貢方物織皮絨罽香木其國山川明秀人俗朴實奉佛有浮屠數區壯麗如王宮西洋西域皆商販於此大

抵皆羽毛織文玉石香木駝羊也布帛銀錢皆可交易

### 覽邦

覽邦洪武九年遣人來朝貢永樂宣德中嘗附鄰國貢方物其國去西  
域遠甚無市賈販地多沙礫麻麥之外無他穀山坡坨無峰巒水亦淺  
濁俗亦好佛勤賽祀有駝馬牛羊市亦用錢

### 火刺札

火刺札國微人弱物產涼薄四圍皆山山鮮草木水流曲折亦無魚蝦  
城僅里許皆土屋板屋王居亦陋俗尙佛重僧喜中國磁器針線永樂  
十四年嘗遣人朝貢

### 討來思

討來思在海中周徑不百里城近山山下有水赤色望之如火然俗尙  
佛婦人主家事市中多駝羊馬牛亦有布縷毛褐交易用錢土宜麥穄  
無稻穀宣德六年嘗遣人朝貢

吃力麻兒

吃力麻兒永樂中遣使十一人來朝貢方物惟獸皮鳥羽罽褐之類其  
俗不事耕農喜射獵山卑水淺西南傍海東北林莽深密多猛獸毒蟲  
得中國雄黃麝香磁器甚喜有達巷無市肆交易無期用錢鐵

失刺思

失刺思永樂間遣人來朝貢時遣內外官以綺幣磁器市馬於迤西撒  
馬兒罕失刺思諸國獻陵卽位詔諸使至十日內就所在還京無得托

故稽留宣德中遣使八人來朝貢

納失者罕

納失者罕東去失刺思數日程皆舟行海中其國山林川澤有林木魚蟲城東平原饒水草可牧馬馬有數種最小者高不過三尺俗敬事僧僧所至必飲食之顧尙氣健鬪鬪不勝者衆共嗤之永樂中遣使十人來朝貢

亦思把罕

亦思把罕於西南海中爲大國廣袤近千里四面皆海西北多山東南皆平沙國有城堅壯王居亦侈麗物產豐厚風俗質朴尙佛畏刑喜施惡奪亦有中國人寓寄者時時出賈撒馬兒罕市多馬駝少布帛有珠

珀而無稻黍日食惟麥穄麥粒麤壯甘美永樂中遣使四十四人來朝貢

淡巴

淡巴在西南海中洪武十年國王遣人來貢賜之金幣其國風景秀贍土地廣衍泉甘而水清草木暢茂畜產甚夥城以石築屋以瓦覆王乘輿官跨馬頗有威儀國人勤生種藝織縷抱布男女咸務常業市有交易野無寇盜稱樂土矣

甘把里

甘把里永樂間遣六人來朝貢自言其國小介其西南海中與諸鄰國不通交易物產又薄山無長林田無宿麥以故國用常乏人民艱窘然

奉佛善不求積聚無乞丐者

### 白松虎兒

白松虎兒舊名速麻里兒國中無大山山卑小者亦鮮林木無猛獸毒虫之害先時嘗有白虎出松林中遇獸不食遇人不傷旬月後竟不見國人稱爲神虎父老又曰此西方白虎降精以是更其國爲白松虎兒永樂中遣使十六人來貢

### 答兒密

答兒密永樂間遣使十八人來朝貢方物賜大統曆文綺藥茶國在海中不百里人不滿千家有牆壘而無城郭屋以板覆田以牛耕王居官舍不甚差別產馬駝羊牛毛褐布縷交易兼用銀錢刑專笞朴服屬撒

馬兒罕

阿速

阿速在西海中爲大國多撒馬兒罕天方諸國人有城倚山面川川南流入海海有魚鹽之市野有耕牧之利敬佛畏鬼好布施惡爭鬪物產饒裕涼暄適節人無飢寒夜無寇盜永樂中遣百十二人來朝貢

沙哈魯

沙哈魯永樂間遣七十七人來朝貢國在阿速西南海島中人民淳直耻鬪好佛交易海中諸國西域賈胡來市海中奇物不惜高價亦有價廉而得奇貨去者沙哈魯人不識也王及酋長居城中有瓦屋庶人旅處城外田野中村落相聚山川環抱畜產豐利

西蕃

西蕃卽土蕃本羌屬凡百餘種散處河湟洮岷間元世祖始爲郡縣以  
吐蕃僧八思巴爲大寶法王帝師領之嗣世弟子號司空司徒國公佩  
金玉印明興洪武六年令諸酋舉故官授職以攝帝師喃加巴藏卜爲  
熾盛佛寶國師元國公南哥思丹八亦監藏等爲都指揮同知宣慰使  
元帥招討等官自是蕃僧有封灌頂國師及贊善王闡化王正覺大乘  
法王如來大寶法王者俱賜印誥令比歲或間歲朝貢今其地爲都指  
揮使司二曰烏思藏曰朵甘指揮使司一曰隴答宣慰使司三曰朵甘  
曰董卜韓胡曰長河西魚通寧遠招討使司六曰朵思曰朵甘瓏答  
曰朵甘丹曰朵甘滄塘曰朵甘川曰磨兒勘萬戶府四曰沙兒可曰乃

竹曰羅思端曰別思麻千戶所十七闡化闡教輔教三王貢使自四川入贊化王自陝西入每貢百人多不過五十人大乘大寶二法王貢無每貢僧徒十人凡諸王嗣封賜誥袈裟僧帽數珠鈴杵以大慈恩寺刺麻僧二人充正副使四川自黎州或天全陝西自洮州出境宣德元年封大寶大乘闡教闡化贊善五王九年闡化王貢使癿藏等還以賜物易茶至臨洮沒入茶并留癿藏等聞上命釋之還其茶成化五年封闡教輔教二王十六年封闡化王皆厚賞長河西魚通寧遠歲一貢貢止五六十年多不過百人自雅州入正統初來貢賞甚厚五年刺麻僧貢馬十年番僧亦貢馬景泰四年入貢賞稍減天順元年貢賞如故三年尊勝寺清修翊善大國師獲印遣人貢舍利成化初番僧入貢十二年

貢使九百人賞少減弘治二年貢使千三百人減賞朵甘思洪武十八  
年令歲一貢自雅州入天順七年宣慰使來貢厚賞董卜韓胡亦一貢  
如朵甘思四川威茂松番金川雜谷達思蠻諸番僧皆三歲一貢貢百  
人多不過百五十人或歲一貢貢三十人多不過五十人洮岷番寺歲  
一貢貢一寺四五十人番簇二年一貢大簇四五人小簇一二至京餘  
留塞上洪武四年置洮州衛軍民指揮使司永樂九年置洮州茶馬司  
火把藏思曩曰諸簇歲納馬三千五百匹洪武初置河州衛改河州衛  
軍民指揮使司七年置河州茶馬司必里衛二州七站西番二十九簇  
歲納馬七千七百五匹洪武十一年置岷州衛軍民指揮使司又置西  
寧衛西寧茶馬司歲納馬三千五百匹市法上馬茶百二十斤中馬七

十斤下馬五十斤五王諸僧番簇在四川西寧洮岷河出陝西西寧在黃河北洮岷河在黃河南陝西諸番畏宋將軍四川諸番敬信丁大夫丁大夫玉國初爲御史大夫出鎮四川最久威惠並行夷民安輯宋將軍晟洪武永樂中久鎮西陲積功封西寧侯丁宋皆充平羌將軍成化十九年西番滿松反侵內地巡撫都御史馬文升討之斬首八十三級正德初北虜徙居西海蠶食諸番勢漸吞併識者慮其結勾深入如前代吐蕃吐谷渾事當是時虜在西海言官言前代有屯兵青海以絕羌虜連和內侵者然徵輸調發民力大困正德十年調朔方勁兵逐勦虜避走松潘旋歸故巢費以萬計竟無成功嘉靖元年西番反鎮守都督鄭卿討之不能克班師自是歲入境殺虜人畜八年洮岷番賊數至鞏

昌殺吏士掠人畜焚廬舍隴右騷動尙書王瓊請賊入聽官軍襲至賊巢勦殺番人畏之已而兵至塞防秋套虜番賊遂乘虛深入臨洮鞏昌殺掠大慘尙書李承勣言西番土地被西海虜酋亦卜刺侵占日益內徙將來番胡交通益肆猖獗何以善後昔漢趙充國不戰而服羌段頻殺羌百萬爲費以億計內地虛耗是知用勇將者雖可取快目前任老成者必能獲萬全之策乞廣宣帝之明專充國之任制馭西番事宜悉令瓊從長區處上從之瓊曰欲撫罕必勦先零遣遊擊將軍彭槭鎮守都督劉文統兵自固原進至洮岷分據要害且撫且勦撫定六十五簇恃險拒戰者十六簇斬首三百七十四番風俗大抵皆質直朴魯上下一心君臣爲友吏治無文音樂尙琴瑟食酪衣氈居毳帳務耕牧好狠

鬪貴壯賤弱懷恩重利尊釋信詛其山川崑崙山可跋海黃河折支湟水爲大產金銀銅錦犧牛名馬天鼠皮獨峰駝青稞麥蕡豆穖羊貢物多畫佛銅佛塔舍利足力麻鐵力麻鼈龜珊瑚犀角左髻毛纓明盃甲刀劍遮甲麻衣馬青鹽外史氏曰西戎亦能爲中國患從申侯逼遷西周附隗囂族拒東漢唐連吐番直入長安宋失熙河併於西夏爲禍不小我以官賞貢市羈縻之西鄙稍寧正德以後邊防大弛戎心遂啓瓊議欲於洮岷河蘭間繕城堡遠斥堠廣儲蓄謹備海賊勿使得連西番卽有侵侮發請精兵駐臨洮鞏昌要害之地拒之斯良策也

韃靼

韃靼北胡也卽夏獯鬻周獮狁秦漢匈奴唐突厥宋契丹漢時匈奴最

強匈奴弱而烏桓遂盛漢末鮮卑滅烏桓鮮卑既衰蠕蠕強大與魏爲敵蠕蠕滅而突厥起盡有西北地唐李靖滅突厥五代及宋契丹爲盛女真滅契丹號金侵中國遂稱皇帝其別小部曰蒙古曰太赤烏曰塔塔兒曰克列各有分地蒙古并諸部滅女真及宋國號元入主中國明興逐元順帝遁歸朔漠傳子愛猷識里達臘愛猷識里達臘死子脫古思帖木兒立爲可汗我兵出塞獲其子地保奴脫古思帖木兒爲也速迭兒所弑諸大臣立坤帖木兒爲可汗而猛哥帖木兒爲瓦刺王建文三年坤帖木兒死鬼力赤立爲可汗阿魯帖木兒乃兒不花阿魯台佐之馬哈木者居瓦刺時時與阿魯台相讐殺自順帝至鬼力赤凡七世其二世不可考鬼力赤衰諸酋立本雅失里爲可汗殺我使臣給事中

郭驥我遂封瓦刺馬哈木爲順寧王太平賢義王把禿孛羅安樂王令  
伺本雅失里我兵出塞本雅失里敗走阿魯台來降封爲和寧王而馬  
哈木又叛我兵討馬哈木敗去阿魯台又叛阿魯台弑本雅失里自稱  
可汗馬哈木屢敗阿魯台而瓦刺強盛瓦刺三王馬哈木獨強洪熙元  
年馬哈木欲自立爲可汗恐衆不附仍立元孽脫脫不花爲可汗居沙  
漠北馬哈木居瓦刺宣德九年阿魯台死正統元年馬哈木之子脫懽  
在沙漠西北與其部酋朵兒只伯相讐殺脫懽死其子也先爲太師驥  
勇凌脫脫不花景泰中也先弑脫脫不花自稱田盛大可汗已而爲其  
平章哈刺逐死天順初孛來殺哈刺立小王子小王子又爲孛來癟王  
子所弑孛來衰而其大酋毛里孩阿羅出孛羅出猛可少師與孛來癟

王子讐殺而立脫思爲王脫思者故小王子從兄也成化中阿羅出結  
癿加思蘭孛羅出結毛里孩出入河套癿加思蘭強殺阿羅出併其衆  
而結滿都魯王入河套滿都魯稱可汗而癿加思蘭爲太師與毛里孩  
乜烈忽孛羅忽出入塞下癿加思蘭欲殺滿都魯而立幹赤來爲可汗  
不克癿加思蘭爲滿都魯所殺滿都魯衰而把禿猛可王太師亦思馬  
因知院羅干強盛弘治初把禿猛可死弟伯顏猛可立爲王當是時瓦  
刺與伯顏猛可皆遣人入貢而火篩數入寇火篩者小王子部落也與  
小王子相讐殺小王子益衰正德中瓦刺西徙與土魯番相讐殺小王  
子三子長阿爾倫台吉次阿着滿官噴太師亦不刺弑阿爾倫台吉走  
河西阿爾倫台吉二子長卜赤次也明皆幼阿着稱小王子阿着死衆

立卜赤稱亦克罕卜赤死而不及兒台吉稱小王子或曰不及兒台吉卽也明或曰卜赤子也阿着二子曰吉囊曰俺答亦不刺部從吉囊火篩部從俺答于是小王子種落又盛嘉靖中吉囊俺答最强犯我陝西河東雲中上谷而亦不刺及瓦刺時時出入寧夏甘肅塞下吉囊死其子板不孩與不及兒台吉出入河套庚戌入古北口犯京師自後秦晉燕代漁陽遼東西無寧歲歲請費帑金數百萬計征調勞煩而權門大吏寵賄益章本兵邊鎮文武大臣多受誅殛戰守無策專事蒙蔽矣其俗無城郭宮室徒帳房逐水草畜牧射獵有徵會刻木封箭爲信挾其長技上下山谷往來聚散忽如風雨其喜盜好殺輕生嗜利篡弑蒸淫三綱瀆亂自古然矣產馬橐駝野馬羱羊角端鱣貂鼠青鼠土撥鼠納

沙雞酥酪四夷惟韃靼種最多最狡凶悍爲中國患最甚別爲北虜考

皇明四夷考卷下終

子履準校

孫心材重校